

**Եվրոպայի խորհրդի «Ազգային փոքրամասնությունների իրավունքների պաշտպանության մասին» շրջանակային կոնվենցիայի կատարման վերաբերյալ  
Հայաստանի Հանրապետության երրորդ զեկույց**

**Ներածություն**

1. Եվրոպայի Խորհրդի «Ազգային փոքրամասնությունների իրավունքների պաշտպանության մասին» շրջանակային կոնվենցիայի (այսուհետ՝ Շրջանակային կոնվենցիա) 25-րդ հոդվածի 2-րդ կետին համապատասխան՝ Հայաստանի Հանրապետությունը ներկայացնում է նշված կոնվենցիայի կատարման վերաբերյալ երրորդ պարբերական զեկույցը:
2. Ձեկույցը ներառում է տեղեկատվություն կոնվենցիայի դրույթների կատարման ուղղությամբ 2004-2009թթ. ընկած ժամանակահատվածում ձեռնարկված միջոցառումների վերաբերյալ՝ համաձայն Եվրոպայի խորհրդի Նախարարների կոմիտեի (97) 10 բանաձևի 21-րդ կետի:
3. Ձեկույցը մշակվել է Հայաստանի Հանրապետության կառավարության 2007թ. նոյեմբերի 23-ի թիվ 1483-Ն որոշմամբ հաստատված՝ Հայաստանի Հանրապետության ազգային զեկույցների պատրաստման և հաստատման կարգին համապատասխան:
4. Վերոհիշյալ կարգին համապատասխան՝ զեկույցի պատրաստման նպատակով ստեղծվել է միջգերատեսչական աշխատանքային խումբ, որում ընդգրկված են հետևյալ մարմինների ներկայացուցիչները.
  - Հայաստանի Հանրապետության արտաքին գործերի նախարարություն,
  - Հայաստանի Հանրապետության արդարադատության նախարարություն,
  - Հայաստանի Հանրապետության կրթության և գիտության նախարարություն,
  - Հայաստանի Հանրապետության մշակույթի նախարարություն,
  - Հայաստանի Հանրապետության ոստիկանություն,
  - Հայաստանի Հանրապետության Նախագահի աշխատակազմ,
  - Հայաստանի Հանրապետության Ազգային ժողով,
  - Հայաստանի Հանրապետության կառավարություն,
  - Հայաստանի Հանրապետության ազգային վիճակագրական ծառայություն,
  - Հայաստանի Հանրապետության հեռուստատեսության և ռադիոյի ազգային հանձնաժողով,
  - Երևանի քաղաքապետարան,
  - Հայաստանի Հանրապետության մարդու իրավունքների պաշտպանի աշխատակազմ
  - Հայաստանի Հանրապետության ազգային փոքրամասնությունների ազգային-մշակութային կազմակերպությունների համակարգող խորհուրդ:Աշխատանքային խումբը զեկույցը մշակելիս համագործակցել է ազգային փոքրամասնությունների հասարակական կազմակերպությունների հետ: Ձեկույցի նախագիծը քննարկվել է ազգային փոքրամասնությունների ներկայացուցիչների և հասարակական կազմակերպությունների հետ 2009թ. հոկտեմբերին կայացած կլոր սեղան քննարկման ժամանակ:

5. Ձեկույցը հաստատվել է Հայաստանի Հանրապետության կառավարության կողմից՝ 2009թ. հոկտեմբերի 29-ին:
6. Եվրոպայի խորհրդի Նախարարների կոմիտեի Մարդու իրավունքների զեկուցող խմբի կողմից սահմանված ձևաչափին համապատասխան (GR-H(2008) 11rev)՝ զեկույցում ներառված է տեղեկատվություն նախորդ զեկույցի արդյունքների հիման վրա ազգային մակարդակով ձեռնարկված միջոցառումների վերաբերյալ (Բաժին 1) և Շրջանակային կոնվենցիայի կատարման վերաբերյալ (Բաժին 2):

### **Բաժին 1**

#### **Շրջանակային կոնվենցիայի կատարման 2-րդ մոնիտորինգային փուլի արդյունքներն ամփոփող ազգային մակարդակով իրականացված գործնական քայլերը**

7. Շրջանակային կոնվենցիան՝ կից փաստաթղթերով, ինչպես նաև ազգային փոքրամասնությունների իրավունքների, մշակույթի և լեզվի պաշտպանությանն ուղղված մի շարք այլ փաստաթղթեր հայերեն լեզվով տեղակայվել են Հայաստանի Հանրապետության կառավարության պաշտոնական կայքում (<http://www.gov.am/am/staff-structure/info/74/>):
8. 2008թ. ԵԱՀԿ Երևանյան գրասենյակը, Հայաստանի Հանրապետության արտաքին գործերի նախարարության և կառավարության կրոնի և ազգային փոքրամասնությունների վարչության հետ համագործակցությամբ, նախաձեռնել է ազգային փոքրամասնությունների իրավունքներին, ինչպես նաև կրոնի, խղճի և դավանանքի ազատությանն առնչվող միջազգային իրավական փաստաթղթերի (ՄԱԿ, ԵԽ և ԵԱՀԿ) և Հայաստանի Հանրապետության օրենսդրական ակտերի ժողովածուի (հայերեն և ռուսերեն) հրատարակման գործընթացը: Գործընթացն իր վերջնական փուլում է, և նախատեսվում է, որ ժողովածուն լույս կտեսնի 2009թ. ընթացքում: Այն կարևորվում է ազգային փոքրամասնությունների ներկայացուցիչների համար իրենց իրավունքների վերաբերյալ իրազեկվածության բարձրացման առումով, ինչպես նաև Հայաստանի Հանրապետության համապատասխան պետական մարմինների համար կիրառական նշանակության տեսանկյունից:
9. Հայաստանի Հանրապետության մարզպետարանների և Երևանի քաղաքապետարանի ներկայացուցիչների հետ քննարկվել է ազգային փոքրամասնությունների և կրոնական կազմակերպությունների վերաբերյալ օրենքով ամրագրված քաղաքականությունը, մասնավորապես ներկայացվել են Շրջանակային կոնվենցիան՝ բացատրական զեկույցով, և «Տարածաշրջանային կամ փոքրամասնությունների լեզուների եվրոպական խարտիան» (այսուհետ՝ Խարտիա): Էլեկտրոնային կրիչի վրա նրանց տրամադրվել է ազգային փոքրամասնությունների իրավունքներին վերաբերող միջազգային և ազգային օրենքների ժողովածուն ներկայացնող մեկական փաթեթ, ինչպես նաև Եվրոպայի խորհրդի համապատասխան փորձագիտական կոմիտեների կարծիքները

Հայաստանի Հանրապետության կողմից վերոհիշյալ կոնվենցիայի և Խարտիայի ներդրման ընթացքի վերաբերյալ:

10. Հայաստանի Հանրապետության արտաքին գործերի նախարարության հետ միասին կազմակերպվել և 2007թ. նոյեմբերի 13-ին անց է կացվել Շրջանակային կոնվենցիայի` Հայաստանում ներդրման ընթացքի շուրջ ամփոփիչ քննարկում, որին մասնակցել են Եվրոպայի խորհրդի` ազգային փոքրամասնությունների իրավունքների գծով փորձագետներ, Հայաստանի Հանրապետության շահագրգիռ նախարարությունների, մարզպետարանների, ազգային փոքրամասնությունների, շահագրգիռ հասարակական այլ կազմակերպությունների ներկայացուցիչներ, թվով` շուրջ 80 մարդ:
11. Հայաստանի Հանրապետության արտաքին գործերի նախարարության հետ միասին կազմակերպվել և 2007թ. նոյեմբերի 14-15-ին անց է կացվել միջազգային խորհրդաժողով` նվիրված Շրջանակային կոնվենցիայի ներդրման ընթացքի խնդիրներին: Մասնակցել են Եվրոպայի խորհրդի` ազգային փոքրամասնությունների իրավունքների և Տարածաշրջանային կամ փոքրամասնությունների լեզուների Եվրոպական խարտիայի գծով փորձագետներ, Հունգարիայի, Ռումինիայի, Վրաստանի, Ռուսաստանի ներկայացուցիչներ, միջազգային և տեղական փորձագետներ :
12. 2006թ. նոյեմբերի 4-5 Ծաղկաձոր քաղաքում տեղի է ունեցել սեմինար, որին մասնակցել են Հայաստանի Հանրապետության ազգային փոքրամասնությունների հասարակական կազմակերպությունների ղեկավարները: Սեմինարի ընթացքում ի թիվս ազգային փոքրամասնություններին հուզող շատ հարցերի քննարկվել է նաև Շրջանակային կոնվենցիայի խորհրդատվական կոմիտեի Հայաստանի վերաբերյալ 2-րդ կարծիքը: Քննարկման արդյունքները ներառվել են Հայաստանի Հանրապետության մեկնաբանությունների մեջ, որոնք ևս քննարկվել են ազգային փոքրամասնությունների հասարակական կազմակերպությունների հետ:
13. ԵԱՀԿ երևանյան գրասենյակի և Համաշխարհային անկախ երիտասարդական միավորման նախաձեռնությամբ, Հայաստանի Հանրապետության կառավարության ազգային փոքրամասնությունների և կրոնի հարցերի վարչության աջակցությամբ 2008թ. հուլիսի 29-ին մեկնարկել են վերապատրաստման մեկշաբաթյա դասընթացներ Հայաստանի ազգային փոքրամասնությունների երիտասարդության շրջանում առաջնորդների կարողությունների զարգացման և խորացման նպատակով: Այս դասընթացը ԵԱՀԿ գրասենյակի և վարչության հետ համատեղ մշակած հանդուրժողականության վերաբերյալ ծրագրի մի մասն է: Դասընթացների ընթացքում ազգային փոքրամասնությունների երիտասարդ ներկայացուցիչներին բաժանվել են «Ազգային փոքրամասնությունները Հայաստանում (պարտավորություններ. հնարավորություններ)» գրքույկը, որտեղ զետեղված են Շրջանակային կոնվենցիան և այլ փաստաթղթեր: Լուսաբանվել է Շրջանակային կոնվենցիան և քննարկվել են ազգային փոքրամասնությունների երիտասարդ ներկայացուցիչներին հուզող խնդիրները:

14. Երկրորդ ազգային զեկույցի արդյունքները պաշտոնապես չեն թարգմանվել և հրապարակվել ազգային փոքրամասնությունների լեզուներով, սակայն այն տարածելու նպատակով, Հայաստանի Հանրապետության կառավարության ազգային փոքրամասնությունների և կրոնի հարցերի վարչության աշխատակիցները հաճախակի այցելում են ազգային փոքրամասնությունների բնակավայրեր, հանդիպում են Հայաստանի Հանրապետության ազգային փոքրամասնությունների հասարակական կազմակերպությունների ներկայացուցիչների, համայնքապետերի, դպրոցների տնօրենների հետ և էլեկտրոնային կրիչի վրա կամ այլ տարբերակով նրանց տրամադրում են Շրջանակային կոնվենցիայի և դրա հետ կապված բոլոր փաստաթղթերի հայերեն և ռուսերեն տարբերակները: Դպրոցների տնօրեններին խնդրվել է դասդեկներին հորդորել բաց դասեր կազմակերպել կամ դասդեկի ժամեր հատկացնել՝ աշակերտներին փաստաթղթի փաթեթին աստիճանաբար ծանոթացնելու նպատակով: Համայնքներում հանդիպումներ են տեղի ունեցել նաև ազգային փոքրամասնությունների լեզուն դասավանդող ուսուցիչների, ինչպես նաև դպրոցի մյուս մանկավարժների, աշակերտների և ծնողների հետ: Հանդիպումների ընթացքում բաժանվել են «Ազգային փոքրամասնությունները Հայաստանում (պարտավորություններ. հնարավորություններ)» գրքույկը:

15. Հայաստանի Հանրապետության կառավարության ազգային փոքրամասնությունների և կրոնի հարցերի վարչության կողմից առաջարկություններ են մշակվել և ուղարկվել Հայաստանի Հանրապետության մշակույթի, Հայաստանի Հանրապետության սպորտի և երիտասարդության և Հայաստանի Հանրապետության կրթության և գիտության նախարարություններին և ազգային փոքրամասնությունների կոմպակտ բնակության վայրեր ունեցող Հայաստանի Հանրապետության մարզպետարաններին, որպեսզի իրենց պաշտոնական կայքերում տեղակայեն ազգային փոքրամասնությունների իրավունքների պաշտպանությանն ուղղված միջազգային պայմանագրերը՝ կից փաստաթղթերով, ինչպես նաև իրենց կողմից ոլորտում իրականացված համապատասխան միջոցառումներն ու ծրագրերը:

16. Հայաստանի Հանրապետության մշակույթի նախարարության ինտերնետային [www.mincult.am](http://www.mincult.am) կայքի «Հասարակական կազմակերպություններ» բաժնում առանձին էլեկտրոնային էջ է տրամադրված Հայաստանում գործող ազգային փոքրամասնությունների միությունների գործունեությանը և տեղեկույթ՝ մշակութային համագործակցության ուղղությունների, համատեղ իրականացվող ծրագրերի ու միջոցառումների վերաբերյալ: Ներկայումս (2009թ. սեպտեմբեր) Հայաստանի Հանրապետության մշակույթի նախարարությունում աշխատանքներ են տարվում մշակույթի ինտերնետային պորտալի ստեղծման ուղղությամբ, որտեղ նախատեսվում է առանձին ինտերնետային կայք տրամադրել Հայաստանի Հանրապետությունում բնակավող ազգային փոքրամասնությունների մշակույթի լուսաբանմանը, իրականացվող պետական և մարզային ծրագրերին ու միջոցառումներին, նրանց վերաբերող մշակույթի ոլորտի իրավական ակտերին և միջազգային փաստաթղթերին:

## Շրջանակային կոնվենցիայի կատարմանն ուղղված միջոցառումներ

### ա) Նախարարների կոմիտեի կողմից ընդունված բանաձևի CM/ResCMN(2007)5 (986-րդ հանդիպում, 07.02.2009թ.) կատարմանն ուղղված միջոցառումներ

1. Նախարարների կոմիտեի կողմից ընդունված բանաձևի CM/ResCMN(2007)5 1  
b) կետով նախատեսված եզրակացությունների կատարման վերաբերյալ

17. Ազգային փոքրամասնություններին պետական բյուջեից տրվող ֆինանսական աջակցության վերաբերյալ հայտնում ենք, որ ֆինանսական աջակցության չափն աճում է ՀՀ սոցիալ-տնտեսական զարգացմանը համեմատ: Այս պահին, տնտեսական ճգնաժամով պայմանավորված, ֆինանսական աջակցության չափը դեռևս հնարավոր չէ ավելացնել նախորդ տարվա համեմատ: Հարկ է նշել, որ չնայած ճգնաժամին, ազգային փոքրամասնությունների կրթամշակութային ծրագրերը շարունակում են անխափան իրականացվել:
18. Հայաստանի Հանրապետության ազգային վիճակագրական ծառայությունը տրամադրել է մարդահամարի արդյունքների վրա հիմնված Հայաստանի Հանրապետության բնակչության կազմը՝ ըստ ազգությունների, քաղաքային/գյուղական բաշխումով, որը ներկայացված է սույն զեկույցի Հավելված 1-ում: Էթնիկ կազմի նշանակալի փոփոխություններ են տեղի ունեցել քաղաքական, տնտեսական և սոցիալական ոլորտներում տեղի ունեցած զարգացումների հետևանք հանդիսացող միգրացիոն գործընթացների արդյունքում: Հավելված 2-ը ներկայացնում է նաև 2002-2008թթ. ժամանակահատվածում միգրացիոն տեղաշարժերի պատկերը և կենդանի ծնվածների ու մահացածների բաշխումը՝ ըստ ազգային պատկանելության:
19. «Հեռուստատեսության և ռադիոյի մասին» Հայաստանի Հանրապետության օրենքը հեռուստառադիոհաղորդումների լեզվի նկատմամբ թեև սահմանում է մի շարք սահմանափակումներ, սակայն դրանք չեն տարածվում ազգային փոքրամասնությունների լեզուների վրա: Բացի այդ, «Հեռուստատեսության և ռադիոյի մասին» Հայաստանի Հանրապետության օրենքի 28-րդ հոդվածում 2008թ. դեկտեմբերի 26-ին կատարվել է փոփոխություն, որով հանրային հեռուստաընկերության համար նախատեսում է պարտավորություն հեռուստալսարանին մատուցել այնպիսի հաղորդումներ, որոնցում հաշվի են առնվում ազգային փոքրամասնությունների շահերը, ինչպես նաև հանրային հեռուստաընկերությամբ հեռարձակել ազգային փոքրամասնությունների լեզուներով հաղորդումներ շաբաթվա ընթացքում՝ մինչև երկու ժամ տևողությամբ:
20. «Այլէթնիկ քաղաքացիների և էթնիկ փոքրամասնությունների մասին» Հայաստանի Հանրապետության օրենքի նախագիծը Հայաստանի Հանրապետությունում ազգային փոքրամասնությունների մասին օրենքի մշակման երրորդ փորձն էր: Նախագծի վերաբերյալ քննարկումների ամփոփումը մնաց անավարտ՝ ազգային փոքրամասնությունների ներկայացուցիչների մի մասի կողմից նախագծի սուր քննադատության և մյուս մասի կողմից հետաքրքրության նվազման պատճառով:

21. Հայտնի է, որ չնայած Հայաստանում ազգային փոքրամասնությունների համայնքների քանակապես համեմատաբար մեծ թվին, դրանց պատկանող անձանց թիվը բավական փոքր է, որը հնարավորություն չի տալիս նրանց անգամ կոմպակտ բնակության վայրերից սեփական պատգամավոր ունենալ: Սրանով է պայմանավորված Հայաստանի Հանրապետության Ազգային ժողովում նրանց ներկայացուցչի բացակայությունը: Մյուս կողմից ազգային փոքրամասնության ներկայացուցիչներն ունեն հավասար իրավունք մասնակցելու քաղաքական կուսակցությունների կյանքին և ստեղծելու իրենց քաղաքական կուսակցությունները: Այդ իրավունքներից օգտվելու հնարավորությունների իրականացումը կախված է նախ և առաջ հենց իրենց շահագրգռվածությունից և հմտություններից:

22. Ինչ վերաբերում է գործադիր մարմիններում և տեղական մակարդակում նրանց ներգրավմանը, ապա այդ գործընթացն իրագործվում է Հայաստանի Հանրապետության օրենսդրության շրջանակներում՝ առանց որևէ խտրականության: Արդյունքում օրենքի պահանջներին բավարարող ազգային փոքրամասնությանը պատկանող քաղաքացիները ծառայության են անցնում գործադիր իշխանության տարբեր մարմիններում: Կոմպակտ բնակության վայրերում նրանք նույնպես ներգրավվում են տարածքային կառավարման և տեղական ինքնակառավարման մարմիններում:

23. Հայաստանի Հանրապետության կառավարության աշխատակազմի ազգային փոքրամասնությունների և կրոնի հարցերի վարչությունը շարունակ հանդիպումներ է ունենում ազգային փոքրամասնությունների ներկայացուցիչների, համայնքների և հասարակական կազմակերպությունների հետ՝ քննարկում նրանց իրավիճակի, հուզող խնդիրների, իրավունքների իրացման հետ կապված հարցերը: Հայաստանի Հանրապետության մշակույթի, Հայաստանի Հանրապետության կրթության և գիտության և Հայաստանի Հանրապետության սպորտի և երիտասարդության հարցերի նախարարությունները ներգրավում են ազգային փոքրամասնություններին իրենց նախատեսած ծրագրերում, վերջիններիս հետ կապված խնդիրները լուծելիս՝ խորհրդակցում նրանց հետ:

*2. Նախարարների կոմիտեի կողմից ընդունված բանաձևի CM/ResCMN(2007)5 2-րդ կետով նախատեսված հանձնարարականների կատարման վերաբերյալ*

- *հանրության, քաղաքական գործիչների և լրատվամիջոցների շրջանում ավելացնել իրազեկումը ազգային փոքրամասնությունների վերաբերյալ,*

24. Հայաստանի Հանրապետության կառավարության ազգային փոքրամասնությունների և կրոնի հարցերի վարչությունը հետևողականորեն աշխատում է հասարակության տարբեր շերտերում ազգային փոքրամասնությունների վերաբերյալ իրազեկման բարձրացման ուղղությամբ: Պարբերաբար հանդիպումներ են տեղի ունենում Հայաստանի Հանրապետության

տարբեր գերատեսչությունների ղեկավարների, նախարարների հետ, ինչպես նաև մամուլի ասուլիսներ տարբեր ակումբներում: Լրատվամիջոցներից շատերն իրենք են շահագրգիռ ազգային փոքրամասնությունների խնդիրները և մշակութային կյանքը լուսաբանելու առումով. դրանցից են «Առավոտ», «Ազգ», «Երկիր», «Հետք» և այլ տպագիր և ինտերնետային թերթեր: «Հայոց աշխարհ» օրաթերթի խմբագրության հետ համաձայնություն է ձեռք բերվել թերթի շրջանակներում պարբերաբար ներկայացնել Հայաստանի Հանրապետության տարածքում ապրող ազգային փոքրամասնությունների մասին տեղեկատվություն:

- *միջոցներ գտնել բարձրացնելու փոքրամասնությունների մասնակցությունը լրատվամիջոցներին և վերացնել իրավական խոչընդոտները հանրային ռադիոյով և հեռուստատեսությամբ փոքրամասնությունների լեզուներով հեռարձակումների համար,*

25. Տե՛ս գեկուցի 19-րդ կետը:

- *շարունակել աջակցել ազգային փոքրամասնությունների հետ խորհրդակցական մեխանիզմներին՝ հաշվի առնելով նրանց բազմազանությունը,*

26. Ազգային փոքրամասնությունների հետ խորհրդակցական մարմին է հանդիսանում Հայաստանի Հանրապետության Նախագահի խորհրդականին կից Ազգային փոքրամասնությունների ազգային-մշակութային կազմակերպությունների համակարգող խորհրդը (այսուհետ՝ Համակարգող խորհուրդ), որը ստեղծվել է 2000թ. մարտին Հայաստանի Հանրապետության ազգային փոքրամասնությունների ազգային-մշակութային կազմակերպությունների համագումարի արդյունքում: Ելնելով Հայաստանի Հանրապետության ազգային փոքրամասնությունների պաշտպանվածությունն ապահովելու, նրանց միջհամայնքային հարաբերություններն ակտիվացնելու, ինչպես նաև հատուկ կրթամշակութային, իրավական և այլ խնդիրների նկատմամբ պետական հոգաձությունն առավել արդյունավետ դարձնելու անհրաժեշտությունից՝ 2000թ. հունիսի 15-ին Հայաստանի Հանրապետության Նախագահին իր կարգադրությամբ հավանություն տվեց Համակարգող խորհրդի ստեղծմանը:

27. Համակարգող խորհրդի անդամները ընտրվում են հետևյալ կերպ. Հայաստանի Հանրապետությունում առկա 11 ազգային փոքրամասնություններից առաջադրվել են երկուական ներկայացուցիչ, որոնք ներկայացնում են յուրաքանչյուր համայնքի տարբեր կազմակերպություններ: Եթե համայնքն ունի մեկ հասարակական կազմակերպություն, ապա երկու անդամն էլ ընտրվում են տվյալ կազմակերպությունից, իսկ եթե համայնքում առկա են երկու կամ ավելի հասարակական կազմակերպություններ, ապա Համակարգող խորհրդի անդամներ են ընտրվում այդ համայնքը ներկայացնող տարբեր հասարակական կազմակերպությունների ներկայացուցիչներից: Այսպիսով, Համակարգող խորհուրդն ունի 22 անդամ: Այն խորհրդատվական մարմին է և իր

գործունեությունն իրականացնում է Համակարգող խորհրդի կողմից հաստատված աշխատակարգին համապատասխան՝ նիստերի միջոցով:

28. Համակարգող խորհրդի հիմնական գործառույթներն են.
  - ազգային փոքրամասնությունների իրավունքների և ազատությունների աջակցությունն ու պաշտպանությունը,
  - ազգային փոքրամասնությունների իրավունքներին առնչվող հիմնախնդիրների վերաբերյալ առաջարկությունների նախապատրաստումը,
  - ազգային փոքրամասնությունների իրավունքների և ազատությունների առնչությամբ իրավական ակտերի նախագծերի քննարկումը, վերլուծությունը և առաջարկությունների պատրաստումը,
  - ազգային փոքրամասնությունների կրթական-մշակութային ծրագրերին առնչվող հարցերի քննարկումը:
  
29. Համակարգող խորհրդի նիստերում քննարկվում են Հայաստանի Հանրապետության վավերացված միջազգային փաստաթղթեր, որոնց մասին Խորհրդի անդամները տեղյակ են պահում ազգային փոքրամասնությունների համայնքների լայն շրջանակներին:
  
30. 2000թ. Համակարգող խորհրդի առաջարկությամբ Հայաստանի Հանրապետության կառավարության կողմից ազգային փոքրամասնությունների կրթական-մշակութային գործունեությանը նպաստելու նպատակով տարեկան 10 միլիոն դրամ է հատկացվում Խորհրդի անդամ հանդիսացող 11 համայնքները ներկայացնող կազմակերպություններին: 2000թ. ի վեր պետական բյուջեն ծրագրվում է այդ գումարի ներառումով: Յուրաքանչյուր տարվա վերջում այդ կազմակերպությունների ներկայացուցիչները միջոցառումների պլանային և ծախսային տեղեկատվություն են ներկայացնում Համակարգող խորհրդին և Հայաստանի Հանրապետության կառավարությանը:
  
31. Յուրաքանչյուր տարվա սկզբում Համակարգող խորհրդի նիստում քննարկվում և հաստատվում է միասնական միջոցառումների ցանկը: Միջոցառումներին մասնակցում են Համակարգող խորհրդում ներկայացված առկա 11 ազգությունների ներկայացուցիչները: Բացի այդ յուրաքանչյուր համայնք իր ազգային տոներին հրավիրում է մնացած բոլոր էթնիկ համայնքների ներկայացուցիչներին: Այսպիսով, միասնաբար նշվում են ինչպես Հայաստանի Հանրապետության պետական, այնպես էլ առանձին-առանձին էթնիկ փոքրամասնությունների ազգային տոները, կազմակերպվում են համաժողովներ և սեմինարներ, արշավներ՝ Հայաստանի պատմական վայրերին ծանոթանալու նպատակով, համերգներ, ընթերցումներ, այս կամ այն ազգության ականավոր գործչին նվիրված երեկոներ և այլն:
  
32. 2006թ. Համակարգող խորհրդի համակարգողի միջամտությամբ Համակարգող խորհրդի անդամների ներկայացմամբ ձևավորվել է Հայաստանի Հանրապետության ազգային փոքրամասնությունների երիտասարդական ջոկատ, որն այդ տարվանից սկսած պարբերաբար փոփոխված կազմով մասնակցում է «Բազե» համահայկական երիտասարդական հավաքին: Ջոկատի մասնակցությունը

իր ինքնատիպությամբ մեծ հետաքրքրություն է առաջացրել և ջերմ վերաբերմունքի արժանացել:

33. Այս ամենը թույլ է տալիս Հայաստանի Հանրապետության տարածքում բնակվող ազգային փոքրամասնություններին ծանոթանալ միմյանց լեզվին, ավանդույթներին, սովորույթներին, ծիսակատարություններին, ինչն իր հերթին փոխընթացման, հանդուրժողականության մթնոլորտ է ձևավորում և նպաստում մշակույթների փոխթափանցմանն ու հարստացմանը:
34. 2007թ. ՀՀ Նախագահի խորհրդականի նախաձեռնությամբ և Համակարգող խորհրդի որոշմամբ նկարահանվեց Ֆիլմաշար` նվիրված Հայաստանում բնակվող բոլոր ազգային փոքրամասնություններին: Նկարահանման օպերատորն էր Համակարգող խորհրդի անդամ, լեհական համայնքը ներկայացնող Գուրգեն Գաղաչիկը: Ֆիլմաշարը հեռարձակվել է Հանրային հեռուստաընկերության Հ1 հեռուստաալիքով:
35. 2006թ. նոյեմբերի 4-5 Ծաղկաձորում Համակարգող խորհրդի նախաձեռնությամբ և ՀՀ Նախագահի աջակցությամբ Հայաստանի Հանրապետության կառավարության ազգային փոքրամասնությունների և կրոնի հարցերի վարչության հետ համատեղ տեղի է ունեցել սեմինար Շրջանակային կոնվենցիայի, դրա կատարման վերաբերյալ Հայաստանի մասին Խորհրդատվական կոմիտեի երկրորդ կարծիքի, Եվրոպական խարտիայի և «Ազգային փոքրամասնությունների մասին» Հայաստանի Հանրապետության օրենքի նախագծի վերաբերյալ: Սեմինարին մասնակցում էին Համակարգող խորհրդի անդամները, ազգային-մշակութային կազմակերպությունների նախագահները, ներկայացուցիչներ Հայաստանի Հանրապետության կրթության և գիտության, Հայաստանի Հանրապետության արդարադատության, Հայաստանի Հանրապետության մշակույթի և երիտասարդության հարցերի նախարարություններից, Լեզվի պետական տեսչությունից, Հանրային հեռուստառադիոընկերության խորհրդից, ԵԱՀԿ-ից, Եվրոպայի խորհրդի երևանյան գրասենյակից, Մարդու իրավունքների պաշտպանի աշխատակազմից և քննարկվող հարցերի հետ առնչվող այլ անձինք:
36. Պետք է նշել, որ Համակարգող խորհուրդը նաև ակտիվ մասնակցություն է ցուցաբերում երկրի քաղաքական և հասարակական կյանքում: Նրա անդամների նախաձեռնությամբ և ազգային փոքրամասնությունների համայնքների մյուս ներկայացուցիչների մասնակցությամբ կազմակերպվել են մի շարք թեմատիկ քննարկումներ և հրավիրվել են մամլո ասուլիսներ` Հայաստանի Հանրապետության Սահմանադրության մեջ փոփոխություններ կատարելու, հասարակական կարևոր նշանակություն ունեցող, ինչպես նաև հարևան պետություններում ազգային փոքրամասնություններին առնչվող խնդիրների կապակցությամբ: Պարբերաբար կազմակերպվում են Համակարգող խորհրդի հանդիպումները Հայաստանի Հանրապետության Նախագահի հետ, ուր վերջինիս անդամները անմիջականորեն Նախագահին են ուղղում իրենց հուզող հարցերը:

37. Համակարգող խորհրդի անդամներից մի քանիսը, սեփական նախաձեռնությամբ, որպես դիտորդ մասնակցել են Լեռնային Ղարաբաղի Հանրապետության սահմանադրական հանրաքվեին:
38. 2007թ. աշնանը կազմակերպվել է Համակարգող խորհրդի անդամների ճանաչողական այցելությունը Լեռնային Ղարաբաղի Հանրապետություն, որտեղ նրանք հանդիպել են հանրապետության բարձրաստիճան ղեկավարության հետ: Պարբերաբար կազմակերպվել են արշավներ Հայաստանի տարբեր մարզեր, ուր այցելելով՝ ազգային փոքրամասնությունների ներկայացուցիչներն առավել լայն պատկերացում են կազմել հայոց պատմության, մշակույթի ու միջմշակութային կապերի մասին: Կազմակերպվել է նաև Համակարգող խորհրդի անդամների այցելությունը Եղեգիս գյուղում վերջերս հայտնաբերված հրեական բնակավայր և գերեզմանոց:
39. Համակարգող խորհրդի գործունեության ընթացքում առավել հիշարժան են հետևյալ նախաձեռնությունները.
- եզդիերեն և ասորերեն լեզվով տարրական դասարանների դասագրքերի տպագրությունը,
  - Ազգությունների մշակութային կենտրոնի ստեղծումը, որի գաղափարը ծնվել է Խորհրդի նիստերում, այնուհետև ներկայացվել Հայաստանի Հանրապետության Նախագահին և Հայաստանի Հանրապետության կառավարությանը: 2006թ. Հայաստանի Հանրապետության կառավարությունն իրականացրել է այդ գաղափարը. Երևան քաղաքի կենտրոնում Հայաստանի Հանրապետության ազգային փոքրամասնությունների համար բացվել է Ազգությունների մշակութային կենտրոն, որը Հայաստանի Հանրապետության Նախագահի անմիջական միջամտությամբ կահավորվել և համալրվել է տեխնիկական սարքավորումներով:
  - Հայաստանի Հանրապետության Նախագահի խորհրդականի առաջարկությամբ 2007-2008 ուսումնական տարում երկու նպատակային տեղերի հասկացումը եզդի, քուրդ և ասորի շրջանավարտների համար Երևանի պետական համալսարանի արևելագիտության ֆակուլտետի արաբագիտական բաժնում,
  - 2007թ. սկսել է լույս տեսնել նոր քրդական «Զագրոս» պարբերականը:
40. Հայաստանի Հանրապետության Նախագահի կողմից 2008թ. հունիսի 13-ի հրամանագրով ստեղծվել է նոր խորհրդակցական մարմին՝ Հանրային խորհուրդը: Հանրային խորհուրդն ապաքաղաքականացված մարմին է, որի գործունեությունը հիմնվում է Հայաստանի Հանրապետության քաղաքացիների, հասարակական միավորումների, սփյուռքի ներկայացուցիչների կամավոր մասնակցության սկզբունքի վրա: Հանրային խորհուրդը նպաստում է ժողովրդավարական համակարգի զարգացմանն ու մարդու և քաղաքացու հիմնարար իրավունքների և ազատությունների ապահովմանը, հասարակության մեջ անհանդուրժողականության մթնոլորտի առաջացման կանխարգելմանը և քաղաքացիական հասարակության կայուն զարգացմանն ու ամրապնդմանը, պետական իշխանության մարմինների և քաղաքացիների, հասարակական այլ միավորումների (քաղաքացիական ինստիտուտների) միջև փոխադարձ վստահության կայացմանը, հասարակության և իշխանության միջև երկխոսության

ու վստահելի գործընկերային հարաբերությունների ձևավորմանը, պետական կառավարման մեջ նրանց ներգրավվածության աստիճանի բարձրացմանը, ինչպես նաև հասարակական վերահսկողության իրականացմանը:

41. Ազգային փոքրամասնությունների իրավունքների պաշտպանության և խնդիրների լուծման հետ կապված հիմնահարցերը վեր հանելու և քննարկելու նպատակով Հանրային խորհրդում ստեղծվել է հատուկ հանձնաժողով, որի մեջ են մտնում բոլոր ազգային փոքրամասնությունների ներկայացուցիչները:

- *ավելացնել ջանքերը՝ ապահովելու բավարար և որակավորված ուսուցիչների և դասագրքերի մատչելիությունը փոքրամասնությունների լեզուների ուսուցման համար, միջոցներ ձեռնարկել՝ ստեղծելու նախադպրոցական կրթություն, հատկապես այն վայրերում, որտեղ ազգային փոքրամասնություններն ապրում են զգալի թվով, ավելի շատ լուծումներ կիրառել՝ նվազեցնելու բացակայությունների մակարդակը, որ ազդում է որոշ ազգային փոքրամասնությունների պատկանող աշակերտների վրա,*

42. Ըստ «Հայաստանի Հանրապետության պետական և համայնքային նախադպրոցական ուսումնական հաստատությունների օրինակելի հաստիքացուցակի, խմբերի խտությունը, նորմատիվները հաստատելու մասին» Հայաստանի Հանրապետության կրթության և գիտության նախարարի 2007թ. հունվարի 26-ի հրամանի՝ երեխաների խմբերի խտության հավելվածում առանձին դրույթ է նվիրված ազգային փոքրամասնությունների երեխաներ պարունակող խմբերի գործարկման հնարավորությանը՝ թերհամալրված համակազմով, ինչը կխթանի այդ երեխաների ընդգրկումը նախադպրոցական կրթության ուսումնական հաստատություններում: Այսպես, օրինակ, եթե նախադպրոցական հաստատությունների մանկապարտեզային խմբերում երեխաների համակազմի ցուցանիշները սահմանված են 25-30, ապա ազգային փոքրամասնություններով երեխաների խմբերի գործարկումը թույլատրվում է 8-10 երեխաների առկայության դեպքում:

43. Ստորև ներկայացվում են ազգային փոքրամասնությունների բնակչություն ունեցող Հայաստանի Հանրապետության բնակավայրերում նախադպրոցական ուսումնական հաստատությունները կամ խմբերը.

- Արտաշատում 1 մանկապարտեզ՝ ռուսերենի ուսուցմամբ, Արարատի մարզի զինվորական կայազորի ռուս երեխաների համար,
- Շիրակի մարզի Գյումրի քաղաքում զինվորական կայազորի ռուս երեխաների համար 2 մանկապարտեզ՝ ռուսերենի ուսուցմամբ:

44. Արարատի մարզի Վերին Դվինի դպրոցում կան ասորերեն ուսուցմամբ դասարաններ, չկա ասորական մանկապարտեզ, սակայն ներկայումս ասորական համայնքը ձեռնարկել է նախկին կիսաքանդ մանկապարտեզի շենքի վերանորոգումը՝

այն նախադպրոցական խմբերի ընդգրկմամբ կրթամշակութային կենտրոնի վերածելու նպատակով:

45. Երևանի Կենտրոն համայնքում «Պիրեա» ՍՊԸ կարգավիճակով գործել է մեկ նախադպրոցական խումբ (տնօրեն՝ ազգությամբ հույն է), սակայն ներկայումս, պահանջարկ չլինելու հետևանքով, գործում է հայկական խումբ: Մանկապարտեզում կազմակերպվում են տարաբնույթ կրթամշակութային միջոցառումներ հունական համայնքի համար:

46. Գյումրիի թիվ 18 մանկապարտեզի տնօրենը ազգությամբ եզդի է, Երևանի Կենտրոն համայնքում թիվ 6 մանկապարտեզի տնօրենը ազգությամբ ռուս է: Ազգությամբ ռուս են նաև զինվորական կայազորների ենթակայության մանկապարտեզների տնօրենները:

- *շարունակել հնարավորություններ տրամադրել ազգային փոքրամասնությունների պատկանող այն անձանց, ովքեր նախընտրում են ռուսերեն լեզվով կրթությունը,*

47. Հայաստանի Հանրապետությունում ռուսերենով ուսուցմամբ հանրակրթական դպրոցներ՝ ըստ մարզերի

Վայր	Դպրոց
Երևան	7
	8
	29
	35
	55
	69
	62
	77
	85
	109
	122
	124
	132
	164
147	
176	
Կոտայքի մարզ	Հրազդանի թիվ 10 դպ.
	Աբովյանի թիվ 4 դպ.
	Նոր Հաճնի թիվ 2 դպ.
	Առզնիի գ. դպ.
	Չարենցավանի թիվ 3 դպ.
Գեղարքունիքի մարզ	Սևանի թիվ 3 դպ.

Շիրակի մարզ	Գյումրիի թիվ 2 դպ.
	Գյումրիի թիվ 7 դպ.
	Գյումրիի թիվ 23 դպ.
Լոռու մարզ	Վանաձորի թիվ 4 դպ.
	Վանաձորի թիվ 11 դպ.
	Տաշիրի թիվ 1 դպ.
	Ֆիոլետովոյի դպ.
	Լերմոնտովոյի դպ.
Արմավիրի մարզ	Արմավիրի թիվ 5 դպ.
	Վաղարշապատի թիվ 5 դպ.
Տավուշի մարզ	Դիլիջանի թիվ 2 դպ.
	Իջևանի թիվ 5 դպ.
Արարատի մարզ	Արտաշատի թիվ 4 դպ.
	Վերին Դվին գյուղի դպ.
	Դիմիտրովի գյուղի դպ.

48. Հայաստանի Հանրապետությունում կան նաև Ռուսաստանի Դաշնության բանակի կայազորի 6 դպրոցներ, որից երկուսը՝ Երևանում, մնացածը՝ Արտաշատում, Մեղրիում, Արմավիրում, Գյումրիում: Հանրապետության 1410 միջնակարգ դպրոցներից մեկը ռուսերենով ուսուցմամբ է, իսկ 39-ում, որից 2-ը մասնավոր են, գործում են ռուսերենով ուսուցմամբ 1-11-րդ դասարաններ՝ (առանձին դպրոցներում բացակայում են որոշ դասարաններ): 37 դպրոցից 16-ը Երևանում են, իսկ մնացածը՝ մարզերում: Ներկայումս Երևանում գործում են երկու մասնավոր դպրոց՝ «Սլավյանակայա» (դպրոցը ռուսերենով ուսուցմամբ է), «Մաշտոց» (ունի ռուսերենով ուսուցմամբ դասարաններ):
49. Սովորողների թիվը այս դասարաններում կազմում է շուրջ 10 հազար աշակերտ, որոնց ծնողներն ունեն Ռուսաստանի քաղաքացիություն կամ ազգությամբ ռուս են: Ռուսերենով ուսուցմամբ դասարաններում սովորում են նաև ազգային փոքրամասնությունների և Ռուսաստանից վերադարձած աշակերտները, որոնք ընդունվում են ռուսերենով ուսուցմամբ դասարաններ:
50. Հայաստանի Հանրապետության կառավարության և Ռուսաստանի Դաշնության կառավարության միջև կրթության և գիտության ոլորտում համագործակցությունը հիմնականում իրականացվում է «Հայաստանի Հանրապետության կառավարության և Ռուսաստանի Դաշնության կառավարության միջև մշակույթի, գիտության և կրթության բնագավառներում համագործակցության մասին» համաձայնագրի շրջանակներում (1995թ. նոյեմբեր): Ելնելով վերոհիշյալ համաձայնագրից՝ Հայաստանի Հանրապետության կրթության և գիտության նախարարությունը հանդիսանում է գործընկեր Ռուսաստանի Դաշնության կրթական և գիտական ծրագրերի իրականացման գործընթացում:
51. Ռուսերենով ուսուցմամբ դպրոցներում (դասարաններում) օգտագործվում են Ռուսաստանի Դաշնության կրթության նախարարության կողմից երաշխավորված

դասագրքերը, ինչպես նաև Հայաստանի Հանրապետության կրթության և գիտության նախարարության կողմից երաշխավորված և հաստատված ծրագրերը:

52. 2006թ. սկսած յուրաքանչյուր տարի Ռուսաստանում Հայաստանի տարվա կապակցությամբ Ռուսաստանի կրթական և գիտական հաստատություններում անց են կացվել մի շարք միջոցառումներ՝ Հայաստանի և Ռուսաստանի գիտնականների, ինչպես նաև կրթության և գիտության ասպարեզում ակնավոր գործիչների մասնակցությամբ:
53. Հանրապետության բոլոր հանրակրթական հայկական դպրոցներում ռուսաց լեզուն և գրականությունը դասավանդվում է սկսած 2-րդ դասարանից մինչև 11-րդ դասարան, և ուսուցումը իրականացվում է Հայաստանում ստեղծված դասագրքերով, որտեղ հաշվի են առնվել ազգային դպրոցում ռուսաց լեզվի դասավանդման առանձնահատկությունները:
54. 1999թ. ընդունված Հայաստանի Հանրապետության կառավարության որոշմամբ Հայաստանի Հանրապետությունում բացվել են ռուսերենի խորացված ուսուցմամբ դպրոցներ (թվով 60), որտեղ առարկան դասավանդվում է 1-ին դասարանից: Այդ դպրոցների համար հրատարակվել են հատուկ դասագրքեր և մեթոդական ձեռնարկներ:
55. Հայաստանի Հանրապետության ԿԳՆ կրթության ազգային ինստիտուտի և Հայաստանի Հանրապետության ռուսաց լեզվի զարգացման կենտրոնում պարբերաբար անց են կացվում ռուսաց լեզվի ուսուցիչների վերապատրաստման դասընթացներ, սեմինար-խորհրդակցություններ: Նման դասընթացներ են կազմակերպվում նաև Հայ-ռուսական (Սլավոնական) համալսարանում: Յուրաքանչյուր տարի ուսուցիչների մի քանի խմբեր վերապատրաստման են մեկնում Մոսկվա:
56. Հայաստանի որոշ դպրոցները կրում են ռուս գիտնականների, գրողների և բանաստեղծների անունները՝ Ա.Սախարովի անվան, Վ.Մայակովսկու անվան, Ա.Բլոկի անվան, Ա.Չեխովի անվան, Վ.Բելինսկու անվան, Լ.Տոլստոյի անվան և այլն: Ա.Պուշկինի անունը կրող դպրոցները (Գյումրի, Վանաձոր, Ստեփանավան և Երևան քաղաքներում) տարիներ շարունակ մասնակցում են ԱՊՀ և Բալթյան երկրների դպրոցների խորհրդածոլովներին:
57. Հանրապետությունում ամենամյա անցկացվող դպրոցականների օլիմպիադաների առարկայացանկում տեղ է գտել նաև ռուսերենը (դպրոցական, շրջանային, քաղաքային, մարզային, հանրապետական փուլեր): Կազմակերպվում են մրցույթներ և փառատոններ: Հայաստանի դպրոցականները մասնակցում են ռուսաց լեզվի հեռահար (դիստանցիոն) օլիմպիադային և արդեն կան 3 հաղթողներ՝ Երևանից, Կապանից և Սիսիանից:
58. Յուրաքանչյուր տարի դպրոցականները հանգստանում են Ռուսաստանի Դաշնության ամառային կրթական ճամբարներում (միջազգային ճամբար «Մոսկովիա»): Արդեն ավանդույթ է դարձել հանրակրթության ոլորտի ղեկավարների, դպրոցների տնօրենների և ուսուցիչների մասնակցությունը Մոսկվայում կազմակերպվող

սեմինար-համաժողովներին: Հայաստանի Հանրապետության ռուսերենի 21 ուսուցիչներ 2004-2009թթ. դարձել են Պուշկինյան մրցանակակիրներ: Ամեն տարի Ռուսաստանի Դաշնությունից Հայաստան, որպես մարդասիրական օգնություն, ներմուծվում է ուսումնամեթոդական գրականություն: Տասը տարի շարունակ Հայաստանի Հանրապետությունում հրատարակվում է «Ռուսաց լեզուն Հայաստանում» ամսագիրը և անվճար տրվում է բոլոր դպրոցներին:

59. Հայաստանի Հանրապետության կրթության և գիտության նախարարությունը Ռուսաստանի Դաշնության տարբեր կրթական կազմակերպությունների և հասարակական կազմակերպությունների հետ համատեղ իրականացնում է տարատեսակ ուսումնական ծրագրեր և նախագծեր, այն նպաստում է Հայաստանի Հանրապետությունում ռուսաց լեզվի տարածմանը, զարգացմանը և դերի բարձրացմանը, որպես միջազգային հաղորդակցման միջոցի:

- *ստանձնել ավելի սիստեմատիկ վերահսկում Մարդու իրավունքների պաշտպանի գրասենյակի ներգրավմամբ խտրականության այն միջադեպերի նկատմամբ, որոնք պայմանավորված են էթնիկ ծագմամբ,*

60. 2003թ. հոկտեմբերի 21-ին ընդունվել է «Մարդու իրավունքների պաշտպանի մասին» Հայաստանի Հանրապետության օրենքը, որից հետո 2004թ. փետրվարի 19-ին Հայաստանի Հանրապետության Նախագահի հրամանագրով Հայաստանի Հանրապետության մարդու իրավունքների պաշտպան նշանակվել և 2004թ. մարտի 1-ից պարտականությունները ստանձնել է իրավապաշտպան, Հայաստանի Հանրապետության Նախագահին առընթեր մարդու իրավունքների հարցերի հանձնաժողովի անդամ, «Ընդդեմ իրավական կամայականության» հասարակական կազմակերպության նախագահ Լարիսա Ալավերդյանը: Օրենքի անցումային դրույթով նախատեսված էր, որ առաջին պաշտպանի լիազորությունները դադարում են սահմանադրական փոփոխություններն ուժի մեջ մտնելուց հետո երեսուներորդ օրը: 2005թ. Հայաստանի Հանրապետության Սահմանադրության փոփոխությունների ընդունումից հետո, համաձայն փոփոխված Սահմանադրության 83.1-րդ հոդվածի, 2006թ. փետրվարի 17-ին Ազգային ժողովի կողմից Հայաստանի Հանրապետության մարդու իրավունքների պաշտպան է ընտրվել Արմեն Հարությունյանը՝ 6 տարի ժամկետով:

61. Յուրաքանչյուր տարվա առաջին եռամսյակի ընթացքում Մարդու իրավունքների պաշտպանը Հայաստանի Հանրապետության Նախագահին, օրենսդիր, գործադիր և դատական իշխանության մարմիններ է ներկայացնում նախորդ տարվա ընթացքում իր գործունեության և երկրում մարդու իրավունքների ու հիմնարար ազատությունների խախտման մասին զեկույց, իսկ Ազգային ժողովի գարնանային նստաշրջանի ընթացքում դա ներկայացնում է Ազգային ժողովի նիստում: Ազգային փոքրամասնությունների համայնքների ղեկավարների և պաշտպանի գրասենյակի միջև ձևավորված են համագործակցային հարաբերություններ: Պաշտպանը և նրա աշխատակազմը մասնակցում են ազգային փոքրամասնությունների համայնքների բոլոր միջոցառումներին:

62. Տե՛ս նաև զեկույցի 80-86 կետերը:

- *երաշխավորել, որ ազգային փոքրամասնությունների վերաբերյալ որևէ օրենք ամբողջությամբ համապատասխանում է Շրջանակային կոնվենցիայի դրույթներին:*

63. Ազգային փոքրամասնությունների վերաբերյալ որևէ օրենք ամբողջությամբ Շրջանակային կոնվենցիայի դրույթներին համապատասխանեցնելու առումով նշենք, որ Հայաստանի Հանրապետության Սահմանադրության 6-րդ, «Միջազգային պայմանագրերի մասին» Հայաստանի Հանրապետության օրենքի 5-րդ հոդվածները երաշխավորում են միջազգային պայմանագրի գերակայությունն ու անմիջական կիրարկումը, «Իրավական ակտերի մասին» Հայաստանի Հանրապետության օրենքի 12-20-րդ հոդվածների համաձայն Հայաստանի Հանրապետության իշխանության մարմինների որոշումները չպետք է հակասեն Հայաստանի Հանրապետության կողմից վավերացված միջազգային պայմանագրերին, իսկ 21-րդ հոդվածի համաձայն «Հայաստանի Հանրապետության օրենքներն ու իրավական այլ ակտերը պետք է համապատասխանեն միջազգային իրավունքի համընդհանուր նորմերին ու սկզբունքներին»:

***բ) Շրջանակային կոնվենցիայի կատարմանը ուղղված միջոցառումներ հողված առ հողված***

### **Հողված 1**

*Ազգային փոքրամասնությունների և այդ փոքրամասնություններին պատկանող անձանց իրավունքների և ազատությունների պաշտպանությունը մարդու իրավունքների միջազգային պաշտպանության անբաժան մասն է և, որպես այդպիսին, հանդիսանում է միջազգային համագործակցության բնագավառ:*

64. Հայաստանի Հանրապետությունը ակտիվորեն համագործակցում է Եվրոպայի խորհրդի ազգային փոքրամասնությունների հարցերով զբաղվող և մոնիտորինգ իրականացնող մարմինների հետ՝ Ազգային փոքրամասնությունների հարցերով փորձագետների կոմիտե (DH-MIN), «Ազգային փոքրամասնությունների իրավունքների պաշտպանության մասին» շրջանակային կոնվենցիայի խորհրդատվական կոմիտե, Ռասիզմի և անհանդուրժողական դեմ եվրոպական կոմիտե (ECRI), «Տարածաշրջանային և փոքրամասնությունների լեզուների մասին» եվրոպական խարտիայի փորձագետների կոմիտե:

65. Հայաստանի Հանրապետության իշխանությունները կարևորում են նաև ռասայական խտրականության ցանկացած դրսևորման դեմ պայքարը թե՛ ազգային, թե՛ միջազգային մակարդակով: Դեռևս 2001թ. Դուրբանում կայացած Ռասիզմի դեմ

համաշխարհային համաժողովի ընթացքում Հայաստանն ընտրվել էր համաժողովի փոխնախագահ՝ ակտիվորեն մասնակցելով դրա աշխատանքներին: Հետագայում, 2009թ. ապրիլի 20-24-ը ժնկում կայացած Դուրբանի վերանայման համաժողովի կազմակերպչական աշխատանքների հենց սկզբից՝ 2007թ.ից, Հայաստանն ակտիվ մասնակցություն է ցուցաբերել այդ գործընթացին՝ ընտրվելով Նախապատրաստական կոմիտեի փոխնախագահ և ղեկավարելով համաժողովի վերջնական փաստաթղթի առաջին նախագծի մշակման աշխատանքները: Դուրբանի հռչակագրի ու գործողությունների ծրագրի սկզբունքներն ընկած են ռասայական խտրականության դեմ պայքարին առնչվող Հայաստանի Հանրապետության պետական մարմինների գործունեության հիմքում: Ազգային մակարդակով դրանք հաշվի են առնվում թե՛ իրավական բարեփոխումների, թե՛ գործնական միջոցառումների իրականացման ընթացքում:

## Հոդված 2

*Սույն Շրջանակային կոնվենցիայի դրույթները պետք է կիրառվեն բարեխիղճ կերպով, ըմբռնման և հանդուրժողականության ոգով և բարիդրացիության, պետությունների միջև բարեկամական հարաբերությունների և համագործակցության սկզբունքներին համապատասխան:*

66. Հաշվետու ժամանակահատվածում Հայաստանում ծավալուն միջոցառումներ են իրականացվել մարդու իրավունքներն պաշտպանությանն ուղղված մեխանիզմները միջազգային չափանիշներին համապատասխանեցնելու ուղղությամբ, վավերացվել են մարդու իրավունքների ոլորտի տասնյակ միջազգային պայմանագրեր և բարեփոխվել է Հայաստանի Հանրապետության օրենսդրությունը:
67. 2005թ. նոյեմբերի 27-ին հանրաքվեով ընդունվել են Հայաստանի Հանրապետության Սահմանադրության փոփոխությունները: Սահմանադրության 3-րդ հոդվածը հռչակում է, որ մարդը՝ նրա արժանապատվությունը՝ հիմնական իրավունքները և ազատությունները բարձրագույն արժեքներ են: Պետությունն ապահովում է մարդու և քաղաքացու հիմնական իրավունքների և ազատությունների պաշտպանությունը՝ միջազգային իրավունքի սկզբունքներին ու նորմերին համապատասխան: Պետությունը առաջնորդվում է մարդու և քաղաքացու հիմնական իրավունքներով և ազատություններով՝ որպես անմիջականորեն գործող իրավունք: Ազատության իրավունքը սերտորեն կապված է անձեռնմխելիության, այն է՝ պետության կողմից երաշխավորված մարդու անվտանգության և ազատության հետ, որը բացառում է մարդու անձի, նրա պատվի և արժանապատվության նկատմամբ ցանկացած ոտնձգություն: Ահա թե ինչու, Սահմանադրության 14-րդ հոդվածի համաձայն «մարդու արժանապատվությունը՝ որպես նրա իրավունքների և ազատությունների անքակտելի հիմք, հարգվում և պաշտպանվում է պետության կողմից»: Հայաստանի Հանրապետության Սահմանադրության փոփոխությունները ուղղված են պաշտպանելու մարդու իրավունքը՝ որոշելու և պահպանելու իր ազգային և էթնիկական ինքնությունը (41-րդ հոդված), մտքի, խղճի և հավատքի ազատության (26-րդ հոդված) և կրոնական (8-րդ հոդված) իրավունքները:

68. Պետությունն ապահովում է մարդու իրավունքների և ազատությունների պաշտպանությունը օրենսդիր մարմնի միջոցով՝ ներպետական իրավական համակարգի ստեղծմամբ: Հարկ ենք համարում նշել, որ Հայաստանի Հանրապետության փոփոխված Սահմանադրությունը նույնպես որդեգրել է ներպետական օրենսդրության մեջ միջազգային պայմանագրային դրույթների ուղիղ փոխակերպման եղանակը: Այսինքն՝ սահմանադրական դրույթի համաձայն Հայաստանի Հանրապետության կողմից վավերացված միջազգային պայմանագրերը Հայաստանի Հանրապետության իրավական համակարգի բաղկացուցիչ մասն են և գերակա են ներպետական օրենքների հանդեպ: Ահա թե ինչու, Սահմանադրության 6-րդ հոդվածի համապատասխան դրույթի համաձայն, վավերացված միջազգային պայմանագրերում և ներպետական օրենքներում սահմանված նորմերի միջև հակասություն առաջանալու դեպքում կիրառվում են պայմանագրի դրույթները:
69. Հայաստանի Հանրապետության Սահմանադրության 41-րդ հոդվածը հռչակում է, որ յուրաքանչյուր ոք ունի իր ազգային և էթնիկական ինքնությունը պահպանելու իրավունք: Ազգային փոքրամասնություններին պատկանող անձինք ունեն իրենց ավանդույթների՝ կրոնի՝ լեզվի և մշակույթի պահպանման ու զարգացման իրավունքը:

### Հոդված 3

1. *Ազգային փոքրամասնության պատկանող յուրաքանչյուր անձ պետք է ունենա այդպիսին համարվելու կամ չհամարվելու ազատ ընտրության իրավունք, և այդ ընտրությունը կամ այն իրավունքների իրականացումը, որոնք կապված են այդ ընտրության հետ, չպետք է տվյալ անձին դնեն անբարենպաստ պայմաններում:*
2. *Ազգային փոքրամասնությունների պատկանող անձինք անհատապես, ինչպես նաև մյուսների հետ խմբերով կարող են իրականացնել իրավունքներ և օգտվել ազատություններից, որոնք բխում են սույն Շրջանակային կոնվենցիայում ամրագրված սկզբունքներից:*

70. Հայաստանի Հանրապետության Սահմանադրության 41-րդ հոդվածում ամրագրված է . «Յուրաքանչյուր ոք ունի իր ազգային և էթնիկական ինքնությունը պահպանելու իրավունք»: Հայաստանում ազգային փոքրամասնությանը պատկանող յուրաքանչյուր անձ ազատորեն ընտրում է իրեն այդպիսին համարել կամ չհամարելը: Հայաստանում առայժմ շարունակվում է եզդիական և քրդական էթնիկ համայնքների միջև անհանդուրժողականությունը: Այս մասին ավելի մանրամասն տե՛ս երկրորդ գեկույցում: Երկրորդ գեկույցում նշված խնդիրը եզդիական և քրդական դասագրքերի հետ կապված լուծվել է: Ստեղծված իրավիճակից դուրս գալու համար նախաձեռնվել է եզդիերեն դասագրքերի տպագրություն եզդիական համայնքի համար և քրդերեն՝ քրդական համայնքի համար:

71. Համաձայն «Հայաստանի Հանրապետությունում անձնագրային համակարգի կանոնադրությունը և Հայաստանի Հանրապետության քաղաքացու անձնագրի նկարագիրը հաստատելու մասին» Հայաստանի Հանրապետության կառավարության որոշման՝ Հայաստանի Հանրապետության քաղաքացու ցանկությամբ նրա անձնագրում կարող է կատարվել նշում ազգության մասին՝ Հայաստանի Հանրապետության ոստիկանության անձնագրերի և վիզաների վարչության կամ նրա տարածքային ստորաբաժանումների, իսկ օտարերկրյա պետություններում՝ Հայաստանի Հանրապետության դիվանագիտական ներկայացուցչությունների կամ հյուպատոսական հիմնարկների կողմից: Ազգային փոքրամասնություններին պատկանող անձինք, իրենց իրավունքների ոչ բավարար իմացության և կիրարկման պատճառով հաճախ չեն օգտվում այդ իրավունքից, որի հետևանքով հնարավոր չի լինում ամբողջական տեղեկատվություն հավաքագրել ազգային փոքրամասնությունների վերաբերյալ:

#### Հոդված 4

1. Կողմերը պարտավորվում են ազգային փոքրամասնությունների պատկանող անձանց համար երաշխավորել օրենքի առջև հավասարություն և օրենքով հավասար պաշտպանություն: Այդ առումով արգելվում է ազգային փոքրամասնության պատկանելության վրա հիմնված ցանկացած խտրականություն:
2. Կողմերը պարտավորվում են անհրաժեշտ դեպքերում ձեռնարկել համապատասխան միջոցներ, որպեսզի տնտեսական, սոցիալական, քաղաքական և մշակութային կյանքի բոլոր բնագավառներում աջակցեն ազգային փոքրամասնությանը և բնակչության մեծամասնությանը պատկանող անձանց միջև լիակատար և իրական հավասարությունը: Այս նպատակով Կողմերը, ըստ պատշաճի, պետք է հաշվի առնեն ազգային փոքրամասնությունների պատկանող անձանց առանձնահատուկ պայմանները:
3. Երկրորդ կետի դրույթներին համապատասխան ընդունված միջոցները չպետք է համարվեն խտրականություն:

72. 2005թ. Սահմանադրական փոփոխություններով ընդունված 14.1-րդ հոդվածը հռչակում է, որ բոլոր մարդիկ հավասար են օրենքի առջև: Խտրականությունը՝ կախված սեռից, ռասայից, մաշկի գույնից, էթնիկական կամ սոցիալական ծագումից, գենետիկական հատկանիշներից, լեզվից, կրոնից, աշխարհայացքից, քաղաքական կամ այլ հայացքներից, ազգային փոքրամասնությանը պատկանելությունից, գույքային վիճակից, ծնունդից, հաշմանդամությունից, տարիքից կամ անձնական կամ սոցիալական բնույթի այլ հանգամանքներից, արգելվում է:

73. 2007թ. Հայաստանի Հանրապետության Ազգային ժողովի ընդունած «Հայաստանի Հանրապետության քրեական դատավարության օրենսգրքում փոփոխություններ և լրացումներ կատարելու մասին» Հայաստանի Հանրապետության օրենքի ընդունման արդյունքում Հայաստանի Հանրապետության քրեական դատավարության օրենսգրքի 8-րդ հոդվածը սահմանում է, որ իրավունքների, ազատությունների և պարտականությունների խտրականությունը՝ կախված

ռասայից, մաշկի գույնից, էթնիկ կամ սոցիալական ծագումից, գենետիկական հատկանիշներից, լեզվից, կրոնից, աշխարհայացքից, ազգային փոքրամասնությանը պատկանելությունից, ծնունդից, արգելվում»:

74. Հայաստանի Հանրապետության վարչական իրավախախտումների վերաբերյալ օրենսգիրքը սահմանում է վարչական իրավախախտման վերաբերյալ գործի քննությունը քաղաքացիների հավասարության սկզբունքներով: Մասնավորապես, 248-րդ հոդվածի համաձայն, «Վարչական իրավախախտման վերաբերյալ գործի քննությունն իրականացվում է օրենքի և գործը քննող մարմնի առաջ բոլոր քաղաքացիների հավասարության սկզբունքներով՝ անկախ նրանց ծագումից, սոցիալական և գույքային դրությունից, ռասայական և ազգային պատկանելությունից, սեռից, կրթությունից, լեզվից, կրոնի նկատմամբ ունեցած վերաբերմունքից, զբաղմունքի տեսակից և բնույթից, բնակության վայրից և այլ հանգամանքներից»:
75. «Հայաստանի Հանրապետության քաղաքացիության մասին» օրենքի 3-րդ հոդվածով սահմանվում է, որ Հայաստանի Հանրապետության քաղաքացիները հավասար են օրենքի առաջ՝ անկախ Հայաստանի Հանրապետության քաղաքացիություն ձեռք բերելու հիմքերից, ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից, գույքային կամ այլ դրությունից, ունեն Սահմանադրությամբ և օրենքներով սահմանված բոլոր իրավունքները, ազատություններն ու պարտականությունները:
76. «Քրեակատարողական ծառայության մասին» Հայաստանի Հանրապետության օրենքի 8-րդ հոդվածով ևս ամրագրվում է, որ բոլորը հավասար են օրենքի առջև և առանց խտրականության հավասարապես պաշտպանվում են օրենքով:
77. Իր հերթին Հայաստանի Հանրապետության քրեական օրենսգիրքը սահմանում է, որ մարդու և քաղաքացու իրավունքներն ու ազատություններն ուղղակի կամ անուղղակի խախտելը՝ կախված անձի ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից, գույքային կամ այլ դրությունից, որը վնաս է պատճառել անձի օրինական շահերին, պատժվում է տուգանքով կամ ազատազրկմամբ:
78. Հաշվետու ժամանակահատվածում Հայաստանի Հանրապետության ազգային խտրականության հողի վրա կատարված հանցագործություններ չեն գրանցվել:
79. Հայաստանի Հանրապետությունում բնակվող 11 ազգային փոքրամասնությունների ներկայացուցիչների կողմից 2004-2009թթ. Հայաստանի Հանրապետության մարդու իրավունքների պաշտպանին հասցեագրվել են 24 դիմում-բողոքներ:
80. Ստացված դիմում-բողոքներում բարձրացված խնդիրները վերաբերել են՝
- Հայաստանի Հանրապետության քաղաքացիություն ստանալու հարցում հանդիպող բարդություններին,
  - բնակարանային խնդիրներին, մասնավորապես, բնակարան ստանալու համար իրավասու մարմիններում հերթագրվելու բարդություններին,

- սոցիալական ծանր պայմաններին,
- սոցիալական ծառայությունների ոլորտում հանդիպող դժվարություններին, մասնավորապես ընտանեկան նպաստի համակարգում ընդգրկվելու, կենսաթոշակ ստանալու հարցերում հանդիպող բարդություններին,
- Հայաստանի Հանրապետության դատական մարմինների կողմից կայացված դատական ակտերի անհիմն լինելուն,
- ազատագրված վայրերում գտնվող անձանց կողմից իրենց նկատմամբ կայացված դատավճիռների հետ համաձայն չլինելու դեպքերին:

81. Վերը նշված դիմումների ուսումնասիրությունը ցույց է տալիս, որ նրանց իրավունքների խախտումները կրել են ընդհանուր բնույթ և կապված չեն եղել նրանց՝ ազգային փոքրամասնության ներկայացուցիչ լինելու հանգամանքի հետ, նրանց բողոքներում ներկայացվել են նույնպիսի հարցեր, ինչպիսիք բարձրացվում են ազգաբնակչության դիմում-բողոքներում ընդհանրապես:

82. Այդ բողոքներին ընթացք է տրվել Հայաստանի Հանրապետության օրենսդրությամբ սահմանված կարգով, գործի բնույթից ելնելով՝ պաշտպանի կողմից կայացվել են «Մարդու իրավունքների պաշտպանի մասին» Հայաստանի Հանրապետության օրենքով նախատեսված որոշումները: Արդյունքները տարբեր են եղել. որոշ բողոքներում բարձրացված հարցերը ստացել են դրական լուծումներ և բողոք բերած անձանց իրավունքները վերականգնվել են: Որոշ բողոքներում ներկայացված իրավունքների խախտման փաստերը պարզապես չեն հաստատվել, ուստի պաշտպանի կողմից կայացվել են մարդու իրավունքների խախտման բացակայության մասին որոշումներ:

83. Միննույն ժամանակ հարկ է նշել, որ երկու դիմումներով ազգային փոքրամասնությունների, մասնավորապես, եզդիական համայնքի ներկայացուցիչները բողոքել են իրենց նկատմամբ դրսևորվող խտրական վերաբերմունքից: Այսպես, նրանք բողոք են ներկայացրել այն մասին, որ իրենց նախնիների գերեզմանները պղծվել են՝ այդ վայրերում շինարարություն իրականացնելու հետևանքով: Բողոքը Պաշտպանի կողմից ընդունվել է քննարկման և դեռևս ուսումնասիրման ընթացքի մեջ է:

84. Մեկ այլ գործով եզդիական համայնքի ներկայացուցիչները բողոքել էին, որ 1991թ. հողի սեփականաշնորհման ժամանակ եզդիների ոչ մի ընտանիք հող չի ստացել, եզդիները ներգրավված չեն գյուղի տեղական ինքնակառավարման մարմնում, գյուղի հայկական թաղամասը գազաֆիկացվել և ասֆալտապատվել է, մինչդեռ եզդիների տները գազաֆիկացված չեն, իսկ նրանց տներին հարող փողոցներն անբարեկարգ վիճակում են, և այլն: Այս բողոքում բարձրացված հարցերի վերաբերյալ պաշտպանը մանրամասն պարզաբանումներ է պահանջել համապատասխան համայնքի ղեկավարից, որը հանգամանորեն պարզաբանել է բողոքում բարձրացված յուրաքանչյուր հարց: Բողոքի քննարկումը դադարեցվել է մարդու իրավունքների խախտման բացակայության հիմքով:

85. Հարկ է նաև նշել, որ Մարդու իրավունքների պաշտպանի հաստատությունը ՄԱԿ-ի հովանավորությամբ իրականացրել է ամփոփ ուսումնասիրություն՝ Հայաստանի Հանրապետությունում ազգային փոքրամասնությունների ներկայացուցիչների կարգավիճակի և նրանց հիմնախնդիրների վերաբերյալ: Հետազոտության արդյունքները շուտով կներկայացվեն Հայաստանի Հանրապետության Ազգային ժողով և այլ պատկան մարմիններ:

## Հոդված 5

- 1. Կողմերը պարտավորվում են նպաստել ազգային փոքրամասնությունների պատկանող անձանց համար այնպիսի պայմանների ստեղծմանը, որոնք նրանց անհրաժեշտ են իրենց մշակույթը պահպանելու և զարգացնելու, ինչպես նաև ինքնության հիմնական տարրերը՝ կրոնը, լեզուն, ավանդույթները և մշակութային ժառանգությունը պահպանելու համար:*
- 2. Իրենց ընդհանուր ինտեգրացիոն քաղաքականության իրականացման համար ձեռնարկվող միջոցներին ոչ ի վնաս Կողմերը պետք է ձեռնպահ մնան ցանկացած քաղաքական կամ գործնական գործողությունից, որը հետապնդում է ազգային փոքրամասնությունների պատկանող անձանց, հակառակ նրանց կամքի, միաձուլելու նպատակ, և պետք է այդ անձանց պաշտպանեն ցանկացած գործողությունից, որը ուղղված է այդպիսի միաձուլման:*

86. Ազգային փոքրամասնությունների մշակութային ժառանգության, մշակույթի պահպանմանը, տարածմանը և զարգացմանը մշտապես նպաստելը հանդիսանում է մշակութային քաղաքականության գերակա ուղղություններից մեկը: Հայաստանի Հանրապետության մշակույթի նախարարությունը սերտ համագործակցության մեջ է ազգային փոքրամասնությունների միությունների և հասարակական կազմակերպությունների հետ և աջակցում է համերգների, ցուցահանդեսների և այլ մշակութային միջոցառումների կազմակերպմանը: Հայաստանի Հանրապետության մշակույթի նախարարությունում ազգային փոքրամասնությունների միությունների ներկայացուցիչների հետ պարբերաբար կազմակերպվում են հանդիպումներ, խորհրդակցություններ, ուր քննարկվում են համատեղ միջոցառումների ծրագրերը, մշակույթի ոլորտում ազգային փոքրամասնությունների հիմնախնդիրները, օրենսդրական դաշտի կատարելագործման առաջարկները: Քննարկումների արդյունքում կազմվում են արձանագրություններ և համապատասխան ստորաբաժանումներին տրվում հանձնարարականներ:

87. Ազգային փոքրամասնությունների ներկայացուցիչները կարող են մշակույթի ոլորտին վերաբերող իրենց առաջարկները ներկայացնել նաև նախարարության ինտերնետային կայքի ([www.mincult.am](http://www.mincult.am)) միջոցով, որտեղ պարբերաբար տեղադրվում է տեղեկույթ մշակութային տարաբնույթ միջոցառումների, ինչպես նաև իրավական դաշտի փոփոխությունների վերաբերյալ:

88. Ազգային փոքրամասնությունների մշակույթի պահպանման և աջակցման նպատակով միջոցառումներ են նախատեսված Հայաստանի Հանրապետության կառավարության 2008-2012թթ. գործունեության միջոցառումների ծրագրի «4.4.4. Մշակույթ» բաժնի «9. Համագործակցություն Հայաստանի տարածքում բնակվող ազգային փոքրամասնությունների հետ» կետով, որի նպատակն է պահպանել ազգային փոքրամասնությունների մշակութային ինքնությունը և ներգրավվել Հայաստանի մշակութային դաշտին՝ ազգային փոքրամասնությունների լեզուներով ոչ պետական մամուլի և գրականության տպագրման, փառատոների կազմակերպման, կրոնական և էթնիկ համայնքների հուշարձանների վերականգման և ժամանակակից արվեստի զարգացմանն աջակցության միջոցով:

89. Հայաստանի Հանրապետության համար հատուկ նշանակություն ունեցող պետական ծրագրերի շրջանակներում՝ Հայաստանի Հանրապետության մշակույթի նախարարությունը մշակել է մի շարք կարևորագույն ռազմավարական ծրագրեր: Դրանցից է Ազգային անվտանգության ռազմավարության (հաստատվել է Հայաստանի Հանրապետության Նախագահի 2007թ. փետրվարի 7-ի հրամանագրով) դրույթների հիման վրա մշակված «Հայաստանի Հանրապետության ազգային անվտանգության ռազմավարության ապահովմանն ուղղված Հայաստանի Հանրապետության մշակույթի նախարարության գործունեությանն ուղղված հաստատելու մասին» Հայաստանի Հանրապետության կառավարության որոշումը և Հայաստանի Հանրապետության կառավարության 2008-2012թթ. ծրագիրը (Հայաստանի Հանրապետության Ազգային ժողովի կողմից հաստատվել է 2008թ. ապրիլի 30-ին): Հայաստանի Հանրապետության ազգային անվտանգության ռազմավարական դրույթներով նախատեսված մշակույթի ոլորտի միջոցառումների ծրագրի 6-րդ կետը վերաբերում է Հայաստանի տարածքում բնակվող ազգային փոքրամասնությունների պատմական, հոգևոր, մշակութային արժեքների և էթնիկական ինքնության պաշտպանությանը և նախատեսում է, որ Հայաստանի Հանրապետության քաղաքականությունը ազգային փոքրամասնությունների ոլորտում խարսխվում է երեք հիմնարար սկզբունքների վրա.

- ա) նպաստել էթնիկ ինքնության պահպանմանը և էթնիկ մշակույթի զարգացմանը,
- բ) կանխարգելել էթնիկ որևէ խտրականություն,
- գ) նպաստել Հայաստանի հասարակության մեջ ոչ հայազգի բնակչության լիարժեք ինտեգրմանը:

90. 2002թ. ընդունված «Մշակութային օրենսդրության հիմունքների մասին» Հայաստանի Հանրապետության օրենքով Հայաստանի Հանրապետությունն աջակցում է իր տարածքում բնակվող ազգային փոքրամասնությունների մշակութային ինքնության պահպանմանն ու զարգացմանը: Ազգային փոքրամասնությունների կրթամշակութային գործունեությանն աջակցելու նպատակով Հայաստանի Հանրապետության պետական բյուջեում յուրաքանչյուր տարի նախատեսվում են ֆինանսական միջոցներ, որոնք հասանելի են բոլոր ազգային փոքրամասնություններին:

91. Հայաստանի Հանրապետության մշակույթի նախարարության տարեկան և միջնա-ժամկետ ծախսային ծրագրերում «Պետական աջակցություն մշակութային միջոցա-

ռումների իրականացմանը» ծրագրի «Աջակցություն ազգային փոքրամասնությունների մշակույթին» ենթածրագրով ամեն տարի նախատեսվում են բյուջետային հատկացումներ Հայաստանի Հանրապետության ազգային փոքրամասնությունների մշակութային միջոցառումներին աջակցելու նպատակով: Մասնավորապես վերոնշյալ ենթածրագրով 2007թ. նախատեսվել էր 700000 դրամ, 2008թ.՝ 1800000 դրամ, իսկ 2009թ. բյուջեում՝ 2300000 դրամ:

92. Բյուջետային հատկացումների աճը հնարավորություն տվեց ոչ միայն ընդլայնել ավանդաբար անցկացվող միջոցառումների մասնակիցների թիվը և աշխարհագրությունը, այլև ներառել նոր ծրագրեր: Հայաստանի Հանրապետության մշակույթի նախարարությունն արդեն 3 տարի իր ամենամյա միջոցառումները՝ երաժշտական փառատոները և նկարչական ցուցահանդեսները, կազմակերպում է մարզերում բնակվող ազգային փոքրամասնությունների հետ սերտ համագործակցության սկզբունքով և ներառում մեծ թվով համայնքային ստեղծագործողների՝ առանց տարիքային սահմանափակման: Բոլոր միջոցառումների ծրագրերը քննարկվում են Հայաստանի Հանրապետության ազգային փոքրամասնությունների կազմակերպությունների ներկայացուցիչների հետ:
93. Միայն ազգային փոքրամասնությունների համար ավանդաբար իրականացվում են.
- Հայաստանի Հանրապետության ազգային փոքրամասնությունների կերպարվեստի և դեկորատիվ կիրառական արվեստի ցուցահանդեսներ, որոնց մասնակցում են ստեղծագործողներ 11 համայնքներից: 2008թ. անց է կացվել 7-րդ ցուցահանդեսը (կազմակերպման համար Հայաստանի Հանրապետության պետական բյուջեից նախատեսվել է 500000 դրամ):
  - Հայաստանի Հանրապետության ազգային փոքրամասնությունների երաժշտական փառատոն, որին մասնակցում են ազգային փոքրամասնությունների բոլոր համայնքների ներկայացուցիչները: Փառատոնին ներկայացվում են ազգային երգն ու պարը, երաժշտությունը: Փառատոնը ավանդաբար անց էր կացվում Երևանում, սակայն վերջին տարիներին այն կազմակերպվում է Հայաստանի Հանրապետության մարզերում, որտեղ հիմնականում բնակվում են ազգային փոքրամասնությունները: 2008թ. փառատոնն անց է կացվել Հայաստանի Հանրապետության Լոռու մարզի Ախթալա քաղաքում (կազմակերպման համար Հայաստանի Հանրապետության պետական բյուջեից նախատեսված էր 700000 դրամ), որի համար Հայաստանի Հանրապետության մշակույթի նախարարը հատուկ մրցանակ է շնորհել «Հայաստանի Հանրապետության ազգային փոքրամասնությունների երաժշտական փառատոնին՝ 2008թ. լավագույն մարզային մշակութային նոր նախագծի համար»:
  - 2008թ. սկսած իրականացվում է նոր ծրագիր՝ «Հայաստանի Հանրապետության ազգային փոքրամասնությունների հուշարձանների այցելության կազմակերպում և տեսաֆիլմի ստեղծում»: Ծրագիրն ունի ոչ միայն գիտաճանաչողական բնույթ, այլև նպատակ ունի հասարակությանը ներկայացնել մշակութային ժառանգությունը (կազմակերպման համար Հայաստանի Հանրապետության պետական բյուջեից նախատեսվել էր 600000 դրամ): Վերոնշյալ ծրագրերի իրականացման համար 2009թ. պետական բյուջեով նախատեսվում է 2300000 դրամ, 2008թ.-ի 1800000 դրամի դիմաց:

- 2008թ. սկսված ծրագրերից է ազգային փոքրամասնությունների գրականության հրատարակումը: Մասնավորապես, հրատարակվել է «Ազգային փոքրամասնությունների ստեղծագործողների գրական ավանախը», որտեղ ներկայացվել են ազգային փոքրամասնությունների ստեղծագործողները, ինչի համար Հայաստանի Հանրապետության պետական բյուջեից 2008թ. տրամադրվել է 950000 դրամ: 2009թ. ազգային փոքրամասնությունների գրականության հրատարակման ուղղությամբ նախատեսվում է 540000 դրամ (տրամադրվող գումարի նվազումը պայմանավորված է երկրի տնտեսական իրավիճակով):
- 2009թ. նախատեսվում է նկարահանել «Ասորիները Հայաստանում» ֆիլմը (պետական բյուջեից նախատեսվում է հատկացնել 1000000 դրամ):

94. Մի շարք միջոցառումներ են կազմակերպվել «Հայաստանի Հանրապետության ազգությունների խորհուրդ» հասարակական կազմակերպության կողմից: Մայրենի լեզվով հեքիաթասացության մրցույթին մասնակցել են նաև ազգային փոքրամասնությունների երեխաները և արժանացել մեդալների իսկության հավատարմագրերով: 2008թ. Ա. Բաբաջանյան համերգասրահում նշվել է երեխաների պաշտպանության օրը, որտեղ ազգային փոքրամասնությունների երեխաները ցուցադրել են իրենց արվեստը, երգն ու պարը: «Հայաստանի Հանրապետության ազգությունների խորհուրդ» հասարակական կազմակերպությունը կազմակերպել է նաև «Քուրդ մտավորականության խորհուրդ» հասարակական կազմակերպության նախագահ Ամարիկե Սարդարի «Свадьбы сыгнали дважды» գրքի շնորհանդեսը, որը լույս է տեսել 2005թ.:

95. Հայաստանի ազգային գրադարանում ազգային փոքրամասնությունների լեզուներով պահվում և օգտագործվում են մոտ 450 հունարեն, 686 քրդերեն և բազմահազար ռուսերեն գրքեր: Այդ լեզուներով մեծաքանակ գրականություն կա նաև հանրապետության այլ գրադարաններում, իսկ ռուսերենով` նաև դպրոցական գրադարաններում: Ինչպես հիշյալ, այնպես էլ այլ փոքրամասնությունների լեզուներով (այդ թվում` Հայաստանի Հանրապետության ազգային փոքրամասնություններից վրացերենի, ուկրաիներենի, բելառուսերենի, գերմաներենի, լեհերենի) զգալի ծավալի գրականություն կա Հայաստանի Հանրապետության Գիտությունների ազգային ակադեմիայի և համապատասխան գիտահետազոտական ինստիտուտների գրադարաններում:

96. 2008թ. «Գրականության գծով պետական պատվեր» ծրագրով հրատարակվել է նաև գրականություն ազգային փոքրամասնությունների լեզուներով: Հրատարակվող գրականության ցանկը բերվում է ստորև ներկայացվող աղյուսակներում.

<i>Ազգային փոքրամասնությունների գրականություն (2008թ.)</i>						
			<i>Ծավալը (տպագրական մամուլ)</i>	<i>Տպաքանակը (օրինակ)</i>	<i>Տպագրվող մեկ օրինակի զինը (դրամ)</i>	<i>Գումարը (դրամ)</i>

1.	Ամարիկե Սարդար	«Մեր գյուղը», պատմվածքներ (քրդերեն)	7	500	1000	500000
2.	Շամոյան Սմո	Ընտրանի	10	500	900	450000
<i>Ընդամենը</i>			<i>17</i>	<i>1000</i>		<i>950000</i>

<i>Ազգային փոքրամասնությունների գրականություն (2009թ.)</i>						
			<i>Ծավալը (տպագրական մամուլ)</i>	<i>Տպաքանակը (օրինակ)</i>	<i>Տպագրվող մեկ օրինակի գինը (դրամ)</i>	<i>Գումարը (դրամ)</i>
1.	Ահմադե Խանի (թարգմանություն քրդերենից՝ Չ. Ռաշ-Մատոյան)	«Մամ ու Զին»	10	300	1000	300000
2.	Սամանդ Սիմա	Պատմվածքներ, քրդերեն	8	300	8000	240000
<i>Ընդամենը</i>			<i>18</i>	<i>600</i>		<i>540000</i>

97. Ազգային փոքրամասնությունների պատմական և ժամանակակից հուշարձանների ճանաչումն ապահովելու նպատակով 2008թ. սկսած մշակույթի նախարարությունը ձեռնարկել է նոր ծրագիր՝ ֆիլմաշարի արտադրություն: Արդեն պատրաստ է Հայաստանի հյուսիսային գոտու՝ Արագածոտնի և Լոռու հուշարձանների վերաբերյալ «Մեր երգն ու մեր հուշարձանները» վերնագրով 34 րոպեանոց տեսաֆիլմը, որտեղ ներկայացված է նաև Ախթալայի երաժշտական փառատոնը:

98. Ներկայիս մշակութային քաղաքականության կարևոր խնդիրներից է նաև ազգային փոքրամասնությունների ստեղծագործողների և խմբերի ներգրավումը մշակութային միջոցառումներին: Մասնավորապես՝ մարզերում մշակութային կյանքն աշխուժացնելու և ստեղծագործական խմբերին խրախուսելու նպատակով նախարարությունը հանրապետական բնույթի միջոցառումներում («Տիկնիկային թատրոնների հանրապետական փառատոն») մշտապես հրավիրում է ազգային փոքրամասնությունների համապատասխան խմբերին (ռուսական «Գարմոշա» թատերախումբ), իրախուսում, նրանց աշխատանքը լուսաբանում ԶԼՄ-ներով:

99. Հայաստանում ազգային փոքրամասնությունների լեզուներով 2008-2009թթ. հրատարակվում է 11 թերթ (այդ թվում՝ 9 մամուլ հրատարակվում է պետական աջակցությամբ) և 4 ամսագիր (որից 3-ը պետական աջակցությամբ): Ստորև աղյու-

սակում ներկայացվում է Ազգային փոքրամասնությունների լեզուներով լույս տեսնող մամուլին 2009թ. նախատեսվող պետական աջակցության տվյալները (2008թ. տրամադրվել է 9627100 դրամ):

Ազգային փոքրամասնությունների լեզուներով լույս տեսնող մամուլ (2009թ.)		Ընդհանուր՝ 12168000 դրամ
<b>Թերթեր</b>		
«Եզդիների ազգային միություն» ՀԿ	«Էզդիխանա»	1000000
«Եզդիների ազգային կոմիտե» ՀԿ	«Լալըշ»	1000000
«Ռեյա-Թազա» թերթի խմբագրություն» ՍՊԸ	«Ռեյա-Թազա»	1000000
«Գոլոս» ՍՊԸ	«Գոլոս Արմենիի»	500000
«Ուկրաինա» Հայաստանի ուկրաինացիների ֆեդերացիա» ՀԿ	«Դնիպրո-Սլավուտիչ»	2668000
«Հայաստանի քրդական ազգային խորհուրդ» ՀԿ	«Զագրոս»	1000000
Հայաստանի հրեական համայնք	«Դավթի վահան»	500000
«Իվերիա» վրացական բարեգործական համայնք» ՀԿ	«Իվերիա»	500000
«Նովոյե վրեմյա» օրաթերթի խմբագրություն» ՍՊԸ	«Նովոյե վրեմյա»	500000
<b>Ամսագրեր</b>		
«ԱՕԿՍ» ՀԿ	«Պալիտրա»	500000
«Պատրիդա» ՀԿ	«Բյուզանդական ժառանգություն»	500000
«Լիտերա» ՍՊԸ	«Լիտերատուրնայա Արմենիա»	2500000

100. Հայաստանի Հանրապետության մշակույթի նախարարության ֆինանսավորմամբ Երևանում և մարզերում ազգային փոքրամասնությունների բոլոր համայնքների մասնակցությամբ ավանդաբար անցկացվում է գեղարվեստի և դեկորատիվ կիրառական արվեստի ցուցահանդես և երաժշտական փառատոն: Հայաստանի Հանրապետությունում պետական պաշտպանության տակ են առնված Հայաստանի Հանրապետության տարածքի ողջ պատմաճարտարապետական, մշակութային և կրոնական կառույցները՝ անկախ դրանց էթնիկ կամ կրոնական պատկանելությունից: Պետությունն ուշադրության կենտրոնում է պահում ազգային առանձին համայնքների մշակութային և ստեղծագործական կյանքը:

101. Ազգային փոքրամասնությունների հասարակական կազմակերպությունների ղեկավարների կողմից բարձրացվել է Երևանի Սարյան 22 հասցեում գտնվող ազգային փոքրամասնությունների մշակույթի կենտրոնի կարգավիճակի հարցը. կամ այն դնել Հայաստանի Հանրապետության մշակույթի նախարարության ենթակայության ներքո, կամ դարձնել առանձին կենտրոն: Մշակույթի նախարարության հետ քննարկման արդյունքում առաջարկվել է այն

նախարարության ներքո պետական ոչ առևտրային կազմակերպություն դարձնել: Գործընթացն առայժմ դադարեցվել է՝ պայմանավորված տնտեսական ճգնաժամով:

102. Ազգային փոքրամասնությունների կազմակերպությունների ներկայացուցիչների կողմից առաջարկել է ազգային փոքրամասնությունների կոմպակտ բնակության մարզերում հիմնել ազգային փոքրամասնությունների մշակութային կետրոններ՝ ինչպես Երևանում: Այս հարցի առնչությամբ Հայաստանի Հանրապետության տարածքային կառավարման նախարարությունը դիմել է մարզպետարաններին: Հարցը տեղերում կքննարկվի համապատասխան համայնքների ղեկավարների և ազգային փոքրամասնությունների ներկայացուցիչների հետ:

103. Հայաստանի Հանրապետության կառավարության կողմից Հայաստանի Հանրապետության ազգային փոքրամասնություններին հատկացվող 10 մլն դրամաշնորհը, որ բաժանվում է ազգային փոքրամասնությունների հասարակական կազմակերպությունների միջև տնօրինվում է այդ կազմակերպությունների նախագահների կողմից: Այդ գումարները հիմնականում ծախսվում են ազգային փոքրամասնությունների համար համայնական նշանակություն ունեցող տոների և միջոցառումների, ինչպես նաև որոշ անհրաժեշտ ծախսեր հոգալու համար (ազգային հագուստի ձեռք բերում, միջոցառումների համար տարածքի վարձակալում, մրցանակներ և այլն): Բացի պետությունից նախատեսված 10 միլիոն դրամ դրամաշնորհից, հասարակական կազմակերպությունները դրամաշնորհ են ստանում նաև իրենց ներկայացրած ծրագրերի դիմաց: Ազգային փոքրամասնությունների հասարակական կազմակերպություններն իրենց կրթամշակութային կարիքները հոգալու համար, բացի Հայաստանի Հանրապետության կառավարության աջակցությունից, սնվում են նաև այլ աղբյուրներից՝ դեսպանատներ, միջազգային հիմնադրամներ և այլն:

104. Մարզային մշակութային զարգացման ծրագրերում հաշվի է առնվում այն հանգամանքը, որ ազգային փոքրամասնությունների ներկայացուցիչները մեծ մասամբ բնակվում են Հայաստանի Հանրապետության մարզերում: Ամեն մարզի նկատմամբ ցուցաբերվում է տարբերակված մոտեցում՝ կախված տվյալ մարզում բնակվող ազգային փոքրամասնության առանձնահատկություններից և հիմնախնդիրներից: Վերոհիշյալ ծրագրերի կազմման աշխատանքներին ներգրավվում են ազգային փոքրամասնությունների միությունների ներկայացուցիչները: Նախատեսվում է Հայաստանի Հանրապետության մարզերում գործող մշակույթի տների վերականգման պետական ծրագիր, որը կնպաստի նաև մշակութային կյանքի աշխուժացմանը և հասարակության ներգրավմանը մշակութային գործունեության մեջ:

105. Ըստ էության գյուղական համայնքներում, ընդհանրապես, մշակութային կյանքն այնքան էլ ակտիվ չէ: Համայնքներում մշակութային միջոցառումները ֆինանսավորվում են գյուղական համայնքների բյուջեի հաշվին, որը ամբողջ երկրի տարածքում, ընդհանուր առմամբ, փոքր գումար է կազմում: Այն հիմնականում չի բավականացնում, մշակույթի տները շատ վատ վիճակում են, շատ քիչ գյուղերում կան երգի պարի համույթներ, երաժշտական գործիքներ: Դպրոցը մշակույթի կենտրոնի դեր է ստանձնել: Դպրոցական միջոցառումների շրջանակներում ներկայացվում է նաև ազգային փոքրամասնությունների մշակույթը: Համայնքների

ազգային փոքրամասնությունների ներկայացուցիչներն ինքնաբուխ նշում են իրենց ավանդական բոլոր տոներն ու ծեսերը: Հարկ է նշել, որ գյուղերում մշակութային կյանքի այս վիճակը համատարած բնույթ է կրում Հայաստանի Հանրապետությունում: Տարբեր ծրագրերով ֆինասավորվում և վերանորոգվում են գյուղերի մշակույթի տները, սակայն դեռ անելիքներ շատ կան: Հայաստանի Հանրապետության կառավարության 2008-2012թթ. ծրագրով նախատեսվում է լուծել սույն խնդիրը, սակայն տնտեսական ճգնաժամն արդեն իսկ խախտել է ժամկետները:

106. Հայաստանը ներգրավված է «Բոլորը տարբեր են, բոլորը հավասար» Եվրոպայի խորհրդի ծրագրին, որի շրջանակում իրականացվող տեղական նախաձեռնություններում հատուկ տեղ է հատկացվել կրոնական և մշակութային հանդուրժողականության զարգացմանը:

107. Ինչպես նշվել է վերը, 2004թ. Հայաստանի Հանրապետության կառավարության կողմից ընդունված որոշմամբ Երևան քաղաքի կենտրոնում տարածք է հատկացվել ազգային փոքրամասնություններին մշակութային կենտրոնի ստեղծման համար, որը բացվել է 2007թ.:

108. Շողակաթ հեռուստաալիքի մանկական հաղորդումների խմբագրության և Հայաստանի Հանրապետության կառավարության աշխատակազմի ազգային փոքրամասնությունների և կրոնի հարցերի վարչության համագործակցությամբ պատրաստվել է Հայաստանում բնակվող ազգությունների և կրոնական մի շարք համայնքների հեքիաթները և դիցաբանությունը (առասպելները) ներկայացնող հաղորդաշար:

109. 2005թ. Հայաստանի Հանրապետության մայրաքաղաքում Հայաստանի Հանրապետության արտաքին գործերի նախարարության և ԵԱՀԿ երևանյան գրասենյակի հովանավորությամբ «Հանդուրժողականության մշակույթ» խորագրով անց է կացվել Հայաստանի հրեա կոմպոզիտոր Վիլլի Վայների ստեղծագործությունների մենահամերգը, պատրաստվել է Վիլլի Վայների` համերգում հնչած և այլ ստեղծագործությունների DVD-ին:

110. 2006թ. Հայաստանի Հանրապետության մայրաքաղաք Երևանի կենտրոնում, հրեական համայնքի ջանքերով, Երևանի քաղաքապետարանի աջակցությամբ և Հանրապետական կուսակցության ֆինանսական օժանդակությամբ կանգնեցվել է Հոլոքոստին և Հայոց ցեղասպանությանը նվիրված հուշարձան:

111. 2007թ. Հայաստանի Հանրապետության կառավարությունը 21 միլիոն դրամ է հատկացրել Հայաստանի Հանրապետության Վայոց Ձորի մարզում գտնվող 14-17-րդ դարերի հրեական գերեզմանատուն-հուշարձանի բարեկարգման աշխատանքների համար, որն ավարտվել է 2008թ. աշնանը: Գերեզմանոցի բարեկարգման նշանավորման արարողությունը և դրան նվիրված միջազգային գիտաժողովը տեղի է ունեցել 2009թ. մայիսին: Միջոցառումը, որին մասնակցել են Իսրայելից ժամանած բարձարաստիճան հյուրեր, Հայաստանի Հանրապետության մշակույթի նախարարության աջակցությամբ կազմակերպել էր Հայաստանյաց

առաքելական եկեղեցու Սյունյաց թեմի առաջնորդը, ով հայտնաբերել և նախապես իր պահպանության տակ էր առել նշված գերեզմանատունը:

112. 2008թ. հուլիսին Հայաստանի Հանրապետության վարչապետը իր հուշամեդալով է պարգևատրել «Հայաստանի հրեական համայնք» հասարակական կազմակերպության ղեկավար տիկին Ռիմա Վարժապետյանին՝ հայ-հրեական կապերի զարգացման և ամրապնդման համար:
113. 2007թ. Հայաստանի Հանրապետության Նախագահի աշխատակազմը ֆինանսական օժանդակություն է ցուցաբերել ասորական, եզդիական և քրդական համայնքներին՝ իրենց երգի-պարի համույթների մասնակիցներին ազգային զգեստներով ապահովելու համար:
114. 2007թ. ազգային փոքրամասնությունների մշակույթի կենտրոնում պետական ֆինանսավորմամբ բացվել է ասորական երգի մշակման և ձայնագրման ստուդիա:
115. ԽՍՀՄ շրջանում ազգայնացված կրոնական կառույցները համապատասխան կրոնական համայնքներին վերադարձնելու գործընթացում 2005թ. ասորական կրոնական համայնքին են վերադարձվել Հայաստանի Հանրապետության Կոտայքի մարզի Արզնի գյուղի Սուրբ Մարիամ (Աստվածածին) և Արարատի մարզի Վերին Դվին գյուղի Սբ. Թովմաս եկեղեցիները: Ռուսական կրոնական համայնքին է վերադարձվել Ռուս Ուղղափառ եկեղեցու Երևան քաղաքի Սուրբ Տիրամոր եկեղեցին:
116. Հաշվի առնելով Հայաստանի ասորական համայնքի խնդրանքը Հայ-ասորի ժողովուրդների՝ 1915թ. անմեղ զոհերի հիշատակին նվիրված հուշարձան տեղադրելու մասին՝ Երևանի քաղաքապետի 2008թ. նոյեմբերի 12-ի որոշմամբ Երևան քաղաքի կենտրոնական մասում՝ Օղակաձև զբոսայգում (Նալբանդյան և Մոսկովյան փողոցների խաչմերուկին հարող տարածք) 16քմ. մակերեսով հողատարածք է հատկացրել հուշարձանի տեղադրման համար: Հուշարձանի տեղադրումը նախագծային աշխատանքների փուլում է:
117. Հաշվետու ժամանակաշրջանում Հայաստանի Հանրապետության կառավարության աջակցությամբ ազգային փոքրամասնությունների կողմից պարբերաբար նշվում են համայնական նշանակություն ունեցող տոներ ու միջոցառումներ, որոնք ներկայացված են հավելված 3-ում: Բացի նշված միջոցառումներից Հայաստանի Հանրապետության կառավարությունը խրախուսում և նպաստավոր պայմաններ է ստեղծում ազգային փոքրամասնությունների համար՝ տարեցտարի հարստացնելու իրենց մշակութային կյանքը զանազան այլ միջոցառումներով, որոնց մի մասը ավանդական դառնալու միտում ունի: Դրանցից են.
  - 2008թ. դեկտեմբերին Երևանի «Նարեկացի արվեստի միության» ցուցասրահում կազմակերպված Հայաստանի ասորական համայնքի արվեստագետների աշխատանքների ցուցահանդեսը, որի բացման արարողության ընթացքում ցուցադրվել է նաև «Ասորիները Արևելյան Հայաստանում» ֆիլմը:

- 2008թ. նոյեմբերին, «Ազգային փոքրամասնությունների մշակույթը» նախագծի շրջանակներում, Կոմիտասի անվան կամերային երաժշտության տանը ներկայացված Գ.Գյուրջիևի ֆոլկլորային ստեղծագործությունները՝ առաջին անգամ ժողովրդական նվագարանների համույթի կատարմամբ:
- Գերմանական համայնքի նախաձեռնությամբ պետական ֆինանսավորմամբ հրատարակված “Судьба – российский немец” (2008թ.) և “Немецкие страницы истории России и Закавказии” (2009թ.) գրքերը:
- 2009թ. ապրիլի 18-19 «Մոսկվայի տուն» մշակութային-բիզնես կենտրոնում տեղի ունեցած «Ռուսաց լեզվով մանկական դպրոցական ներկայացումների» երրորդ փառատոնը:

118. Երկրում բազմամշակութայնությունը խրախուսելու և ազգային փոքրամասնություններին ճանաչելի դարձնելու ուղղությամբ կատարվող քայլերից է «Հայաստանի ազգությունների էստրադային ծիածան» երիտասարդական փառատոնը, որը տեղի է ունեցել «Արամ Խաչատրյան» համերգասրահում 2009թ. փետրվարին: «Հայաստանի ազգությունների էստրադային ծիածան» երիտասարդական փառատոնին մասնակցել են Հայաստանի Հանրապետության ազգային փոքրամասնությունների բոլոր ներկայացուցիչները: Փառատոնը ֆինանսավորվել է Հայաստանի Հանրապետության սպորտի և երիտասարդության հարցերի նախարարության և «Երիտասարդական միջոցառումների կազմակերպման կետրոն» պետական ոչ-առևտրային կազմակերպության կողմից և կազմակերպվել Հայաստանի Հանրապետության կառավարության և Հայաստանի Հանրապետության մշակույթի նախարարության աջակցությամբ:

## Հոդված 6

1. Կողմերը պետք է խրախուսեն հանդուրժողականության և մշակույթների միջև երկխոսության մթնոլորտը և պետք է արդյունավետ քայլեր ձեռնարկեն իրենց տարածքներում բնակվող բոլոր անձանց միջև, անկախ նրանց էթնիկական, մշակութային, լեզվական կամ կրոնական պատկանելությունից, փոխադարձ հարգանքը, փոխըմբռնումը և համագործակցությունը խթանելու համար, մասնավորապես, կրթության, մշակույթի և լրատվական միջոցների բնագավառներում:
2. Կողմերը պարտավորվում են ձեռնարկել համապատասխան միջոցներ այն անձանց պաշտպանելու համար, ովքեր կարող են իրենց էթնիկական, մշակութային, լեզվական կամ կրոնական պատկանելության պատճառով դառնալ սպառնալիքների, խտրականության, թշնամական կամ բռնի գործողությունների զոհ:

119. 2007թ. հունիսին Ամենայն Հայոց Կաթողիկոս Գարեգին Բ-ն Մայր Աթոռ Սուրբ Էջմիածնում ընդունել է Համակարգող խորհրդի անդամներին: Հանդիպման ընթացքում Ամենայն Հայոց Կաթողիկոսը հորդորել է ազգային փոքրամասնություններին պահպանել իրենց ազգային դիմագիծը և, իբրև

Հայաստանի Հանրապետության հավատարիմ քաղաքացիներ, իրենց կարելին ներդնել ի բարօրություն Հայաստանի:

120. 2008թ. դեկտեմբերի 17-ին Երևանի «Նարեկացի արվեստի կենտրոնում» տեղի է ունեցել «Պատկերացրու քո ապագան» ծրագրի շրջանակներում պատրաստված փոքրիկ ֆիլմերի (DigiTale) շնորհանդեսը: Փոքրիկ ֆիլմերը պատրաստվել են Հայաստանում էթնիկ խմբերի ներկայացուցիչների կողմից իրենց հուզող, հետաքրքրող հարցերի, խնդիրների, մտորումների, նույնիսկ՝ իրերի մասին: «Պատկերացրու քո ապագան» ծրագիրը Բրիտանական խորհրդի «Ապրենք միասին» ծրագրի մի մասն է, որի նպատակն է ծրագրի մասնակիցներին՝ էթնիկ խմբերի ներկայացուցիչներին, ազատ արտահայտվելու, իրենց և իրենց էթնիկ համայնքի խնդիրները վեր հանելու հնարավորություն ընձեռել: Էթնիկ խմբերի ներկայացուցիչների կողմից պատրաստված պատմությունները, կտեղադրվեն տարբեր կայքէջերում, կցուցադրվեն հեռուստաընկերություններով և տարբեր միջոցառումների ընթացքում կներկայացվեն հանրության քննարկմանը: Հայաստանի Հանրապետության կառավարության ազգային փոքրամասնությունների և կրոնի հարցերի վարչության աշխատակիցներն աջակցել են Հայաստանում Բրիտանական դեսպանատանը՝ աշխատանքների կազմակերպման ընթացքում:
121. ԵԱՀԿ Երևանյան գրասենյակի և Համաշխարհային անկախ երիտասարդական միավորման նախաձեռնությամբ, Հայաստանի Հանրապետության ազգային փոքրամասնությունների և կրոնի հարցերի վարչության աջակցությամբ 2008թ. հուլիսի 29-ին Լուսակերտում տեղի են ունեցել վերապատրաստման մեկշաբաթյա դասընթացներ Հայաստանի ազգային փոքրամասնությունների երիտասարդության շրջանում առաջնորդների կարողությունների խորացման և զարգացման նպատակով: Այս դասընթացը ԵԱՀԿ գրասենյակի և վարչության հետ համատեղ մշակված հանդուրժողականության վերաբերյալ ծրագրի մի մասն է:
122. 2009թ. մարտի 20-ին Երևան քաղաքի Ազատության պողոտա հասցեում գտնվող Հաղթանակի զբոսայգում (քաղաքի ամենամեծ զբոսայգին) հրեական համայնքի ջանքերով և Երևանի քաղաքապետարանի աջակցությամբ բացվել է Հայաստան-Իսրայել «Բարեկամության ծառուղի»՝ ի պատիվ Իսրայելի պետության 60-ամյակի:
123. 2004թ. սկսած ամեն տարի, ներառյալ նաև այս տարի, դպրոցների ամառային հանգստյան և ճամբարների կազմակերպման ընթացքում Հայ առաքելական եկեղեցու Սյունյաց թեմը հրավիրում է ազգային փոքրամասնությունների հասարակական կազմակերպություններին՝ նրանց երեխաների հանգիստն այդ ճամբարներում հայ երեխաների հետ միասին անցկացնելու: Երեխաների հանգիստը հայ ջոկատավարների հետ միասին կազմակերպում են նաև ազգային փոքրամասնության ներկայացուցիչները: 2009թ. սկսած Հայաստանի Հանրապետության կառավարության ազգային փոքրամասնությունների և կրոնի հարցերի վարչությունը ևս մասնակցում է այդ միջոցառման կազմակերպական աշխատանքներին:

124. Հայաստանի Հանրապետությունում բնակվող ազգային փոքրամասնությունների հետ փոխհամագործակցությունը և երկխոսությունը զարգացնելու նպատակով՝ Հայաստանի Հանրապետության սպորտի և երիտասարդության հարցերի նախարարության կողմից կազմակերպվել են նաև հետևյալ միջոցառումները.
- 2006 և 2008թթ. «Երիտասարդություն. իրականություն, հեռանկարներ» հանրապետական երիտասարդական համաժողով,
  - 2007 և 2008թթ. «Մշակույթների երկխոսություն» միջմշակութային երիտասարդական փառատոն,
  - 2008թ. «Ճանաչենք իրար» պատմաճանաչողական ծրագիր,
  - 2009թ. «Հայաստանի ազգությունների էստրադային ծիածան»:
125. Հայաստանի Հանրապետության սպորտի և երիտասարդության հարցերի նախարարությունը աջակցել է նաև «Իվերիա» համայնքին՝ ապահովելով 2008թ. օգոստոսի 4-14-ը Վրաստանի մայրաքաղաք Թբիլիսիում կայացած «Հայրենական ճամբար» միջոցառմանը մասնակցելու հրավեր ստացած 15 երիտասարդների մասնակցությունը:
126. 2008թ. հունիսի 1-ին՝ երեխաների պաշտպանության օրը, և հեկտեմբերին՝ Էրեբունի-Երևան տոնակատարությունների շրջանակներում ազգային փոքրամասնությունների մասնակցությամբ կազմակերպվել են տոնական համերգներ:
127. Երևանի քաղաքապետարանի աջակցությամբ՝ 2007թ. նոյեմբերի 19-22-ը Երևան քաղաքի պատմության թանգարանում ազգային փոքրամասնությունների ներկայացուցիչները՝ ռուսները, եզդիները, ասորիները, ուկրաինացիները, հույները, վրացիները ցուցադրել են իրենց ազգային-մշակութային գործերը:
128. Ամանորի կապակցությամբ ազգային փոքրամասնությունների ներկայացուցիչները հրավիրվել և մասնակցել են Երևանի քաղաքապետարանում կազմակերպված տոնական ընդունելությանը:
129. Երևանի քաղաքապետարանի աշխատակազմի կառուցվածքային ստորաբաժանումների կողմից աշխատանքներ են տարվել ազգային փոքրամասնությունների մի շարք սոցիալական խնդիրների լուծման ուղղությամբ՝ սոցիալապես անապահով ընտանիքներին օգնության տրամադրում, երեխաների չգրանցված ծնունդների գրանցում, անհրաժեշտ փաստաթղթերի ձեռքբերում, վերականգնում և այլն:
130. Նախատեսվում է Երևանի քաղաքապետարանի «Երևան 7 օր» թերթում, ինչպես նաև «Արմյուզ» հեռուստաալիքով հեռարձակվող «Մայրաքաղաք» ծրագրով այսուհետ ևս հաճախակի անդրադառնալ Երևանում բնակվող ազգային փոքրամասնություններին, նրանց խնդիրներին և հուզով հարցերին:

## Հոդված 7

*Կողմերը պետք է ապահովեն ազգային փոքրամասնության պատկանող յուրաքանչյուր անձի՝ խաղաղ հանրահավաքների, միությունների մեջ ընդգրկվելու, խոսքի, մտքի, խղճի և դավանանքի ազատության իրավունքների հարգումը:*

131. Հայաստանի Հանրապետության Սահմանադրության 26-29-րդ հոդվածները, ինչպես նաև համապատասխան օրենքները երաշխավորում են մտքի, խղճի, կրոնի, համոզմունքների, խաղաղ հավաքներ և միավորումներ կազմելու ազատության և ազատ արտահայտվելու մարդու և քաղաքացու իրավունքները:
132. Հայաստանի Հանրապետության Սահմանադրության 28-րդ հոդվածով սահմանված է, որ յուրաքանչյուր ոք իրավունք ունի այլ անձանց հետ միավորումներ կազմել և դրանց անդամագրվել: Դրա հետ միաժամանակ, հարկ է նշել, որ 47-րդ հոդվածի 2-րդ մասով նախատեսվում է սահմանափակում, մասնավորապես՝ «արգելվում է իրավունքների և ազատությունների Օգտագործումը սահմանադրական կարգը բռնի տապալելու, ազգային, ռասայական, կրոնական ատելություն բորբոքելու, բռնություն կամ պատերազմ քարոզելու նպատակով»:
133. Հաշվետու ժամանակահատվածու ազգային կազմակերպությունների կողմից հանրային միջոցառումների վերաբերյալ Երևանի քաղաքապետարան է ներկայացվել հետևյալ 10 իրազեկումները, որոնք ընդունվել են ի գիտություն, իսկ երթերն ու հավաքներն ընթացել են անխափան.
- «Քուրդիստան» կոմիտե - Մաշտոցի պողոտայի սկզբնամասից, Մաշտոցի պողոտա-Ամիրյան-Աբովյան փողոցներով մինչև Տերյան-Մոսկովյան փողոցների հատման մաս երթուղով երթ (քայլերթ) 13.02.2004թ., ժ.12:00-15:00,
  - «Քուրդիստան» կոմիտե - Սայաթ-Նովա-Չարենց փողոցների հատման մասում հավաք, 29.10.2004թ., ժ. 12:00-14:00,
  - «Քուրդիստան» կոմիտե - Ազատության հրապարակ-Թումանյան-Աբովյան փողոցներ-Հանրապետության հրապարակ երթուղով երթ, 15.02.2005թ., ժ. 13:00-15:00,
  - «Քուրդիստան» կոմիտե - Ազատության հրապարակ-Թումանյան-Աբովյան փողոցներ-Հանրապետության հրապարակ երթուղով երթ, 09.11.2005թ., ժ. 12:00-15:00,
  - «Քուրդիստան» կոմիտե - Դավիթ Անհաղթ փողոցում գտնվող Երախորհրդի երևանյան գրասենյակի մոտ հավաք, 08.03.2006թ., ժ. 12:00-15:00,
  - «Քուրդիստան» կոմիտե - Ս.Շահումյանի անվան հրապարակ-Վ.Սարգսյան փողոց- ՄԱԿ-ի գրասենյակ երթուղով երթ ՄԱԿ-ի գրասենյակի հարակից տարածքում հանրահավաք, 09.03.2007թ.. ժ.13:00-15:00,
  - Հայաստանի քրդական ազգային խորհուրդ - Ս.Շահումյանի անվան հրապարակից մինչև ՄԱԿ-ի գրասենյակ երթուղով երթ, 21.08.2007թ.,
  - «Քուրդիստան» կոմիտե - Ս.Շահումյանի անվան հրապարակից մինչև ՄԱԿ-ի գրասենյակ երթուղով երթ, 15.11.2007թ., ժ. 13:00-15:00,
  - Հայաստանի քրդական ազգային խորհուրդ - Օպերայի հարակից տարածք-Նյուսիսային պողոտա-Հանրապետության հրապարակ կամ

- Քաղաքապետարանի դիմացից Շահումյանի անվան հրապարակով դեպի Հանրապետության հրապարակ երթուղիներով երթ, 28.10.2008թ. ժ. 13:00-15:00,
- Հայաստանի քրդական ազգային խորհուրդ - Շահումյանի անվան հրապարակում հավաք, 14.08.2009թ. ժ.13:00-14:00,
- «Հարմոնիա» ռուսական մշակութային կազմակերպություն - Հայաստանի Հանրապետության անկախության օրվան նվիրված երթ Սարյանի արձանի մոտից մինչև Հանրապետության հրապարակ՝ Ա.Բաբաջանյանի անվան համերգասրահ երթուղեվ Հայաստանի ազգային փոքրամասնությունների բոլոր համայնքների ներկայացուցիչների մասնակցությամբ, 21.09.09թ., ժ. 12:00-13:00:

## Հոդված 8

*Կողմերը պարտավորվում են ճանաչել ազգային փոքրամասնության պատկանող յուրաքանչյուր անձի՝ սեփական կրոնը կամ հավատը բացահայտ դավանելու, ինչպես նաև կրոնական հաստատություններ, կազմակերպություններ և ընկերություններ ստեղծելու իրավունքը:*

134. 2005թ. փոփոխված Հայաստանի Հանրապետության Սահմանադրությունը հստակ սահմանում է իշխանությունների և կրոնական կազմակերպությունների միմյանց գործերին չմիջամտելու սկզբունքը: Սահմանադրության Հոդված 8.1-ում ասվում է. «Հայաստանի Հանրապետությունում եկեղեցին անջատ է պետությունից»: Սահմանադրությունը նախատեսում է պետության և կրոնական տարբեր կազմակերպությունների փոխշահավետ համագործակցություն և գործունեության ազատություն, նշելով «Հայաստանի Հանրապետությունում երաշխավորվում է օրենքով սահմանված կարգով գործող բոլոր կրոնական կազմակերպությունների գործունեության ազատությունը :
135. Միննույն ժամանակ Հայաստանի Հանրապետության Սահմանադրությունը նախատեսում է, որ «Հայաստանի Հանրապետության և Հայաստանյայց առաքելական սուրբ եկեղեցու հարաբերությունները կարող են կարգավորվել օրենքով»: Ղեկավարվելով Սահմանադրության այս դրույթով՝ 2007թ. փետրվարի 22-ին ընդունվեց «Հայաստանի Հանրապետության և Հայաստանյայց առաքելական սուրբ եկեղեցու հարաբերությունների մասին» Հայաստանի Հանրապետության օրենքը : Նշված օրենքն ընդունվել է հաշվի առնելով Հայ առաքելական եկեղեցու պատմական դերը հայ ժողովրդի կյանքում: Միննույն ժամանակ պետք է նշել, որ սույն օրենքի դրույթները որևէ կերպ չեն նսեմացնում մյուս կրոնական կազմակերպությունների՝ Հայաստանի Հանրապետության օրենսդրությամբ և միջազգային պայմանագրերով սահմանված իրավունքներն ու ազատությունները: Այս քայլով նաև պետությունը փորձում է հատուցել այն վնասը, որ պատճառվել է եկեղեցուն արեփզմի ռեժիմի տակ գտնված տարիներին:

136. 2009թ. հունվարի 1-ին Հայաստանի Հանրապետության Ազգային ժողովի պատգամավորների կողմից ներկայացվեցին առաջարկություններ «Խղճի ազատության և կրոնական կողմակերպությունների մասին» Հայաստանի Հանրապետության օրենքում փոփոխություններ և լրացումներ կատարելու մասին և Հայաստանի Հանրապետության քրեական օրենսգրքում փոփոխություն կատարելու մասին օրենքների վերաբերյալ: Կատարված լրացումների նպատակն էր համապատասխանեցնել նշված օրենքը 2005թ. ընդունված Հայաստանի Հանրապետության Սահմանադրությանը և մասնավորապես, 26-րդ հոդվածին, որում սահմանված է. «Յուրաքանչյուր ոք ունի մտքի, խղճի և կրոնի ազատության իրավունք: Այս իրավունքը ներառում է կրոնը կամ համոզմունքները փոխելու ազատությունը և դրանք ինչպես միայնակ, այնպես էլ այլոց հետ համատեղ քարոզի, եկեղեցական արարողությունների և պաշտամունքի այլ ծիսակատարությունների միջոցով արտահայտելու ազատությունը: Այս իրավունքի արտահայտումը կարող է սահմանափակվել միայն օրենքով, եթե դա անհրաժեշտ է հասարակական անվտանգության, առողջության, բարոյականության կամ այլոց իրավունքների և ազատությունների համար»:

137. Նշված լրացումները կարևոր քայլ էին ստանձնած միջազգային պարտավորությունների համաձայն մարդու իրավունքներին վերաբերող երաշխիքները հստակեցնելու և կանոնակարգելու ուղղությամբ: Միջազգային փորձաքննություն անցնելու նպատակով վերոհիշյալ օրենքների փոփոխություններն ուղարկվեցին Եվրոպայի խորհրդի Վենետիկի հանձնաժողով և ԵԱՀԿ Ժողովրդական հաստատությունների և մարդու իրավունքների գրասենյակ՝ համատեղ կարծիքի, որը ընդունվել է 2009թ. հունիսի 23-ին:

138. Կրոնական բազմազանության պայմաններում հայերի մեծամասնությունը, ինչպես Հայաստանում, այնպես էլ նրա սահմաններից դուրս, ազգային Հայ առաքելական եկեղեցու անվանական հետևորդներ են: Չնայած իր գերակայող դրությանը, Հայ առաքելական եկեղեցին հիմնականում ըմբռնումով է վերաբերվում այլ կրոնական դավանանքներին, առանձնապես ազգային փոքրամասնություններին և նրանց ազգային կրոններին:

139. Անկախությունից հետո անցած տարիներին Հայաստանը լուրջ քայլեր է ձեռնարկել երկրում կրոնական բազմազանությունն ապահովելու ուղղությամբ: Եթե 1997թ. երկրի պետական ռեգիստրում գրանցված էին 14 կրոնական կազմակերպություններ, ապա 2009թ. դրությամբ Հայաստանում գրանցված են 13 կրոնական հոսանքներ ներկայացնող 66 հասարակական կազմակերպություններ: Հայաստանի Հանրապետության կրոնական ազգային փոքրամասնությունների կրոնական կազմակերպություններն են.

- «Ռուս Ուղղափառ Եկեղեցու Երևան քաղաքի Ս. Տիրամոր եկեղեցու ուղղափառ համայնք»,
- «Ռուս Ուղղափառ Եկեղեցու Գյումրի քաղաքի Ս. Նիկոլայ Հրաշագործի եկեղեցու ուղղափառ համայնք»,
- «Ռուս Ուղղափառ Եկեղեցու Վանաձոր քաղաքի Ս. Աստվածածնի Ծննդյան եկեղեցու ուղղափառ համայնք»,

- «Ռուս Ուղղափառ Եկեղեցու Հայաստանի Հանրապետության Արարատի մարզի Դիմիտրով գյուղի Կիրիկ և Իուլիտա Սբ. Նահատակների եկեղեցու ուղղափառ համայնք»,
- «Հայաստանի Եզդիների (Շարֆադինի) հետևորդներ կրոնական կազմակերպություն»,
- «Հայաստանի Հանրապետության Եզդիների Ազգային “Շեխի Շեխու Բաքրաե” համայնք»,
- «Հայաստանի Հրեական կրոնական համայնք»,
- «Արևելքի ասորական կաթողիկոսության սուրբ առաքելական եկեղեցի» Հայաստանի ասորական կրոնական կազմակերպություն:

140. Երևանում անարգել գործում է նաև պարսկական Կապույտ մզկիթը: Առանց պետական գրանցման գործում են նաև Լոռու մարզում գտնվող մոլոկանների երկու համայնքները՝ Ֆիոլետովո և Լեբմոնտովո գյուղերում: Նրանք կամովին հրաժարվում են գրանցվել, իսկ պետությունը չի պարտադրում: Գործում է նաև վրացական եկեղեցին, որին պաշտամունքային արարողություններ իրականացնելու համար տարածք է հատկացրել Հայաստանյայց առաքելական եկեղեցին:

141. Պետական կառույցների և կրոնական կազմակերպությունների միջև հարաբերություններն օրենսդրությամբ սահմանված կարգով համակարգում է Հայաստանի Հանրապետության կառավարության աշխատակազմը՝ ազգային փոքրամասնությունների և կրոնի հարցերի վարչության միջոցով: Վարչությունը լայնածավալ աշխատանք է տանում մարդկանց և խմբերի կրոնական իրավունքների իրազեկման ուղղությամբ, արձագանքում է կրոնական կազմակերպությունների կողմից բարձրացվող հարցերին, օժանդակում դրանց լուծմանը, կազմակերպում է քննարկումներ և համաժողովներ:

142. Բոլոր կրոնների և նրանց արժեքային համակարգերի հանդեպ հանդուրժողականության և հարգանքի ձևավորման նպատակով Ազգային փոքրամասնությունների և կրոնի հարցերի վարչության կողմից կազմակերպվում են ամենամյա քննարկումներ՝ Հայաստանի Հանրապետության տարածքում գործող բոլոր կրոնական համայնքների մասնակցությամբ, որոնց հիմնական շեշտադրումը բոլոր կրոնական համայնքների միջև բարյացակամ հարաբերությունների ձևավորումն է:

143. Նկատի ունենալով, որ հանդուրժողականության և հարգանքի հիմքում փոխճանաչողությունն է, Հայաստանում հրապարակվել է տարբեր կրոններին նվիրված գրականություն: Մասնավորապես, Հայաստանի Հանրապետության Գիտությունների ազգային ակադեմիայի Հնագիտության և ազգագրության ինստիտուտի կողմից 2006թ. հրապարակվել է Ա.Ավդալի «Եզդի քրդերի հավատալիքները» աշխատությունը: Հրապարակվել է Եզդիական կրոնական բնագրերի ժողովածու՝ Գ. Ասատրյանի խմբագրությամբ: 2006թ. հայերեն է թարգմանվել և հրատարակվել Ղուրանը (թարգմանության հեղինակ Էդվարդ Հախվերդյան): Վ.Առաքելովայի հեղինակությամբ հրապարակվել է «Շիիզմի հիմունքները» աշխատությունը (Երևան, 1997թ.): Երևանի պետական

համալսարանի Աստվածաբանության ֆակուլտետի կողմից Վ.Խաչատրյանի հեղինակությամբ հրատարակվել է «Բալան» աշխատությունը (Երևան, 2007թ.): Հրատարակվել է Ա. Հակոբյանի, «Դասական ասորերեն» աշխատությունը 2005թ.: Տվյալ հրատարակումը ասորերենի՝ Մերձավոր Արևելքի հնագույն և քրիստոնեության կարևորագույն լեզուներից մեկին նվիրված առաջին հայալեզու դասագիրքն է:

144. Հայաստանի Հանրապետությունում պետական պաշտպանության տակ են առնված Հայաստանի Հանրապետության տարածքի բոլոր պատմաճարտարապետական, մշակութային և կրոնական կառույցները, անկախ դրանց էթնիկ կամ կրոնական պատկանելությունից: Հայ առաքելական եկեղեցու պատմական հուշարձաններից բացի (օրինակ՝ հեթանոսական տաճար, քաղկեդոնիկ եկեղեցիներ և այլն) այս պահին Հայաստանի տարածքում առկա և արդեն բացակայող կրոնական ու էթնիկ համայնքների պատմական պաշտամունքային օջախներից՝ Հայաստանի Հանրապետության մշակույթի նախարարության պատմության և մշակույթի հուշարձանների պահպանության գործակալության տվյալներով, պետության կողմից պաշտպանվում են հետևյալ հուշարձանները.

- Հայ կաթոլիկ եկեղեցի Գյումրիում, կառուցված 1848-1855թթ. Կանոնիկոս վարդապետ Արարատյանի կողմից,
- Ռուսական եկեղեցի Վանաձորում, կառուցված 1895թ., վերանորոգված 1977թ.,
- Ռուսական եկեղեցի Գյումրիում (Պլպլան ժամ), կառուցված 1904թ.,
- Ռուսական եկեղեցի Երևանում, կառուցված 1913թ.,
- Կապույտ մզկիթ (Գեոյ մզկիթ) Երևանում, կառուցված 1766թ.: (1992թ. վերականգնվել է, այսօր այն բաց է այցելուների համար, մզկիթին կից գործում են գրադարան, թանգարան, մշակութային կենտրոն, պարսկերեն լեզվի դպրոց, Երևանի Կապույտ մզկիթը արժեվորվում է որպես Անդրկովկասում պահպանված ուշ պարսկական շինարարական արվեստի աչքի ընկնող օրինակ),
- Աբաս Միրզայի (Մարդարի) մզկիթ Երևանում, կառուցված 19-րդ դ. վերջերին,
- Եկեղեցի Սբ. Կիրիլ (ասորական եկեղեցի), Հայաստանի Հանրապետության Արարատի մարզ, գյուղ Դիմիտրով, կառուցված 1840թ.,
- Եկեղեցի Սբ. Թովմաս (ասորական եկեղեցի), Հայաստանի Հանրապետության Արարատի մարզ, գյուղ Վերին Դվին, կառուցված 19-րդ դ. վերջերին,
- Եկեղեցի Սբ. Մավա (հունադավան եկեղեցի), Հայաստանի Հանրապետության Լոռու մարզ, գյուղ Շամլուղ, կառուցված 1909թ.: Արժեվորվում է որպես Հայաստանում պահպանված հունադավան եկեղեցու օրինակ,
- Հունադավան եկեղեցիներ Հանքավանում (Կոտայքի մարզ) և Յաղդան (Լոռու մարզ) գյուղում,
- Հրեական գերեզմանոց, Հայաստանի Հանրապետության Վայոց ձորի մարզ, Եղեգնաձորի տարածաշրջան, գյուղ Եղեգիս, հարավ-արևելյան եզրին, Եղեգիս գետի ձախ ափին, 14-17-րդ դդ.,
- Քրդական գերեզմաններ, Հայաստանի Հանրապետության Արագածոտնի մարզ, Արագածի ենթատարածք, գյուղ Ռյա թագա, 16-18-րդ դդ.:

145. Հայաստանի Հանրապետության կառավարությունը մի շարք որոշումներ է ընդունել, որոնցով շարունակել է Հայաստանյայց առաքելական եկեղեցուն, Հայաստանի Հայ կաթողիկե եկեղեցուն, «Արևելքի ասորական կաթողիկոսության սուրբ առաքելական եկեղեցի» Հայաստանի ասորական կրոնական կազմակերպություններին վերադարձնել մի շարք եկեղեցիներ:
146. 2004թ. հրատարակվել է «Խղճի, դավանանքի և համոզմունքի ազատություն. իրավունքներ, հնարավորություններ, պարտավորություններ» վերնագրով գրքույկը, որում ներկայացված են Հայաստանի Հանրապետության կրոնական իրավիճակի վերլուծությունը, Հայաստանի Հանրապետությունում գրանցված կրոնական կազմակերպությունների ցանկը, Հայաստանի Հանրապետության Սահմանադրության, Հայաստանի Հանրապետության կողմից ստորագրված միջազգային պայմանագրերի և Հայաստանի Հանրապետության ազգային օրենքների՝ կրոնին և դավանանքին վերաբերող դրույթերը:
147. Խղճի, դավանանքի, համոզմունքի ազատությունը և կրոնական կազմակերպությունների գործունեությունը կարգավորող Հայաստանի Հանրապետության այլ օրենքներից ու իրավական ակտերից կարևոր է «Այլընտրանքային ծառայության մասին» Հայաստանի Հանրապետության օրենքը, որը պարտադիր զինվորական ծառայության զորակոչի ենթակա քաղաքացուն իրավունք է տալիս անցնելու այլընտրանքային ծառայության, եթե նրա կրոնական դավանանքը կամ համոզմունքները հակասում են ռազմական ստորաբաժանումներում պարտադիր զինվորական ծառայություն անցնելուն, ինչպես նաև զենք կրելուն, պահելուն, պահպանելուն և օգտագործելուն: Այս հնարավորությունից օգտվելու ցանկություն չեն հայտնում Հայաստանի Հանրապետության ազգային փոքրամասնությունները:

## Հոդված 9

- 1. Կողմերը պարտավորվում են ճանաչել, որ ազգային փոքրամասնության պատկանող յուրաքանչյուր անձի՝ իր կարծիքն արտահայտելու իրավունքը ներառում է կարծիքներ ունենալու և փոքրամասնության լեզվով տեղեկատվություն և գաղափարներ ստանալու և հաղորդելու ազատությունը՝ անկախ պետական իշխանությունների միջամտությունից և սահմաններից: Իրենց իրավական համակարգի շրջանակներում Կողմերը պետք է ապահովեն, որ լրատվական միջոցների մատչելիության հարցում ազգային փոքրամասնությունների պատկանող անձինք չենթարկվեն խտրականության:*
- 2. Առաջին կետը չի արգելում, որ Կողմերը ռադիոյի և հեռուստահեռարձակման կամ կինեմատոգրաֆիայի ձեռնարկությունների համար արտոնագրում պահանջեն՝ առանց որևէ խտրականության և օբյեկտիվ չափանիշների հիման վրա:*
- 3. Կողմերը չպետք է արգելեն ազգային փոքրամասնությունների պատկանող անձանց կողմից տպագիր մամուլի միջոցների ստեղծումն ու օգտագործումը: Ռադիոյի և հեռուստահեռարձակման իրավական*

*դաշտի շրջանակներում, որքանով դա հնարավոր է, և հաշվի առնելով 1-ին կետի դրույթները՝ Կողմերը ազգային փոքրամասնությունների պատկանող անձանց համար պետք է երաշխավորեն լրատվական սեփական միջոցների ստեղծման և օգտագործման հնարավորություն:*

*4. Իրենց իրավական համակարգերի շրջանակներում Կողմերը պետք է համապատասխան (համարժեք) միջոցներ ձեռնարկեն ազգային փոքրամասնությունների պատկանող անձանց համար լրատվական միջոցների մատչելիությունը դյուրացնելու, ինչպես նաև հանդուրժողականությունը խրախուսելու և մշակութային բազմակարծությունը ապահովելու համար:*

148. 2008թ. դեկտեմբերի 26-ին Հայաստանի Հանրապետության վարչապետ Տիգրան Սարգսյանի մոտ տեղի ունեցավ հանդիպում Հայաստանի Հանրապետության ազգային փոքրամասնությունների հասարակական կազմակերպությունների ղեկավարների հետ: Հանդիպմանը ներկա էին շուրջ 40 հասարակական կազմակերպությունների ղեկավարներ: Վերջիններս հնարավորություն ունեցան անձամբ հայտնել իրենց մտահոգությունները և խնդիրները: Ազգային փոքրամասնությունների ղեկավարների կողմից բարձրացված հարցերը համատեղ քննարկվեցին, հետագայում Հայաստանի Հանրապետության կառավարության ազգային փոքրամասնությունների և կրոնի հարցերի վարչության կողմից հանձնարարականներ ուղարկվեցին համապատասխան գերատեսչություններ:

149. Հայաստանի Հանրապետության կառավարության ազգային փոքրամասնությունների և կրոնի հարցերի վարչությունը պարբերաբար հանդիպումներ է ունենում ազգային փոքրամասնությունների հասարակական կազմակերպությունների ներկայացուցիչների հետ, այցելում է ազգային փոքրամասնությունների համայնքներ: Այս հանդիպումների ընթացքում քննարկվում են ազգային փոքրամասնություններին հուզող խնդիրները, նրանք իրազեկվում են Շրջանակային կոնվենցիայի, ինչպես նաև վավերացրած այլ միջազգային փաստաթղթերի մասին, որոնք առնչվում են ազգային փոքրամասնությունների իրավունքների, մշակույթի և լեզվի պահպանմանն ու պաշտպանությանը: 2008-2009թթ. վարչության նախաձեռնությամբ հանդիպումների շարք է կազմակերպվել ազգային փոքրամասնությունների՝ հունական, հրեական, քրդական, եզդիական, ասորական, ռուսական, ուկրաինական, բելոռուսական, վրացական հասարակական կազմակերպությունների ղեկավարների հետ: Քննարկվել են համայնքներին հուզող խնդիրները, հասարակական կազմակերպությունների կողմից իրականացվող ծրագրերը, այդ ընթացքում ծագած խնդիրները: Հանդիպումների արդյունքում բարձրացված խնդիրները ձևակերպվել են, պատրաստվել հանձնարարականներ և ներկայացվել համապատասխան գերատեսչություններին: Խնդիրների մի մասը լուծվել է, մյուսները գտնվում են քննարկման փուլում:

150. Ազգային փոքրամասնություններին վերաբերող խնդիրները մշտապես գտնվում են Հանրային հեռուստաընկերության ուշադրության կենտրոնում: «Հայլուր» լրատվական ծառայության կողմից պարբերաբար լուսաբանվում են ազգային փոքրամասնությունների խնդիրները և պատմամշակութային միջոցառումները:

Հանրային ռադիոընկերությամբ հեռարձակվում են 13 լեզուներով ամենօրյա հաղորդումներ (ռուսերեն 25ր., գերմաներեն 15ր., ասորերեն 15ր., քրդերեն 30ր., եզդիերեն 30ր. և այլն): Ազգային փոքրամասնությունների կազմակերպած միջոցառումները ներկայացվում է նաև “Армения-наш общий дом” ամենշաբաթյա 30-րոպեանոց ռադիոհաղորդման ընթացքում, որը հեռարձակվում է Հանրային ռադիոընկերությամբ:

151. Հանրային ռադիոն առաջարկել է քրդական համայնքին համատեղ իրականացնել քրդական երաժշտության արխիվի թարմացում:
152. Ազգային փոքրամասնությունների լեզուներով, բացի քրդերեն, եզդիերեն, ասորերեն, վրացերեն, ռուսերեն հիմնական լրատվական թողարկումներից, լինում են նաև պատմամշակութային ու ազգագրական թեմաներին վերաբերող հաղորդումներ: Բացի հանրային ռադիոյի հեռահաղորդակներով հեռարձակվելուց, վերոհիշյալ հաղորդումների կայքէջերը տեղակայված են նաև ինտերնետում. [www.armradio.am](http://www.armradio.am) հասցեով:
153. 2008թ. դեկտեմբերի 26-ին ընդունված «Հեռուստատեսության և ռադիոյի մասին» Հայաստանի Հանրապետության օրենքում լրացումներ և փոփոխություններ կատարելու մասին Հայաստանի Հանրապետության օրենքի համաձայն՝ հստակորեն ամրագրվում է, որ Հանրային հեռուստառադիոընկերությունը պարտավոր է Հայաստանի Հանրապետության ազգային փոքրամասնությունների լեզուներով հատուկ ծրագրերի և հաղորդումների հեռարձակման համար տրամադրել հեռուստատեսությամբ շաբաթական 2 ժամը, իսկ ռադիոյով՝ օրական մինչև 1 ժամը չգերազանցող եթերային ժամանակ:
154. Լրատվամիջոցների հասանելիության առումով Հայաստանի Հանրապետության օրենսդրությունը Հայաստանի Հանրապետության քաղաքիացիների համար ըստ ազգային պատկանելիության որևէ տարբերակում չի նախատեսում: Հայաստանի տարածքում գործող հեռուստաընկերությունների ծրագրերը իրենց սփյուռն տարածքներում հավասարապես հասանելի են բոլորի համար:

## **Հոդված 10 և 11**

### *Հոդված 10*

- 1. Կողմերը պարտավորվում են ճանաչել, որ ազգային փոքրամասնության պատկանող յուրաքանչյուր անձ անձնական կյանքում և հասարակական վայրերում իր փոքրամասնության լեզվից բանավոր և գրավոր անարգել օգտվելու իրավունք ունի:*
- 2. Ավանդապես կամ զգալի քանակությամբ ազգային փոքրամասնությունների պատկանող անձանցով բնակեցված վայրերում, եթե այդ անձինք խնդրել են, և այնտեղ, որտեղ այդպիսի խնդրանքը համապատասխանում է իրական կարիքներին, Կողմերը, որքանով հնարավոր է, պետք է ձգտեն ապահովել այնպիսի պայմաններ, որոնք հնարավորություն կտան այդ անձանց և վարչական իշխանությունների միջև հարաբերություններում օգտագործել*

*փոքրամասնության լեզուն:*

*3. Կողմերը պարտավորվում են երաշխավորել ազգային փոքրամասնության պատկանող յուրաքանչյուր անձի իրավունքը՝ ամենասեղմ ժամկետներում իրեն հասկանալի լեզվով տեղեկություն ստանալ իր ձեռքակալության պատճառների, իր դեմ հարուցված մեղադրանքների բնույթի և պատճառների մասին, ինչպես նաև իր պաշտպանությունը իրականացնել այդ լեզվով՝ դրա համար անհրաժեշտության դեպքում ստանալով թարգմանչի անվճար ծառայություն:*

#### *Հոդված 11*

*1. Կողմերը պարտավորվում են ճանաչել, որ ազգային փոքրամասնության պատկանող յուրաքանչյուր անձ ունի իր անունը, ազգանունը և հայրանունը փոքրամասնության լեզվով օգտագործելու, ինչպես նաև դրանց պաշտոնական ճանաչման իրավունք՝ տվյալ երկրի իրավական պահանջներին համապատասխան:*

*2. Կողմերը պարտավորվում են ճանաչել, որ ազգային փոքրամասնության պատկանող յուրաքանչյուր անձ իր փոքրամասնության լեզվով հասարակության համար տեսանելի մասնավոր բնույթի նշումներ, գրություններ և այլ տեղեկատվություն տեղադրելու իրավունք ունի:*

*3. Ազգային փոքրամասնության պատկանող անձանց զգալի թվաքանակով ավանդաբար բնակեցված տարածքներում Կողմերը իրենց իրավական համակարգերի շրջանակներում, անհրաժեշտության դեպքում ներառյալ նաև այլ պետությունների հետ կնքված համաձայնագրերը, ինչպես նաև հաշվի առնելով կոնկրետ պայմանները, պետք է ապահովեն ավանդական տեղական անվանումների, փողոցների անվանումների, ինչպես նաև բնակչության համար նախատեսված տեղագրական այլ նշումների, փոքրամասնության լեզվով ցուցանակների տեղադրումը, երբ այդպիսի նշումների բավարար կարիք կա:*

155. Հայաստանի Հանրապետության քրեական դատավարության օրենսգրքի 15-րդ հոդվածով սահմանում է, որ քրեական դատավարության ընթացքում յուրաքանչյուր ոք, այդ թվում՝ ազգային փոքրամասնության ներկայացուցիչն իրավունք ունի հանդես գալու այն լեզվով, որին տիրապետում է: Այդ կապակցությամբ և այդ ընթացքում քրեական դատավարության այն մասնակիցը, բացի վարույթ իրականացնող մարմնից, որը չի տիրապետում քրեական դատավարության լեզվին՝ հայերենին, կարող է հանդես գալ այն լեզվով, որին տիրապետում է և այդ ընթացքում նա ապահովվում է թարգմանչով, իսկ օրենքով նախատեսված դեպքերում այդ ծառայությունը տրամադրվում է անվճար: Միաժամանակ քրեական դատավարության լեզվին չտիրապետող անձանց օրենքով նախատեսված դեպքերում տրամադրվում է հանձնման ենթակա փաստաթղթերի վավերացված պատճենները այն լեզվով, որին նրանք տիրապետում են: Հայաստանի Հանրապետության քրեական դատավարության օրենսգրքի նշված պահանջը կիրառվում է քրեական դատավարության լեզվին չտիրապետող յուրաքանչյուր անձի, այդ թվում՝ Հայաստանի Հանրապետության ազգային փոքրամասնությունների նկատմամբ:

156. 2007թ. Հայաստանի Հանրապետության քաղաքացիական դատավարության օրենսգրքում կատարվել է փոփոխություն, համաձայն որի Հայաստանի Հանրապետությունում դատավարությունը տարվում է հայերեն: Գործին մասնակցող անձինք իրավունք ունեն դատարանում հանդես գալու իրենց նախընտրած լեզվով, եթե ապահովում են հայերեն թարգմանությունը (7-րդ հոդված):

157. 2004-2009թթ. ընթացքում ազգային փոքրամասնությունների ներկայացուցիչների կողմից իրենց մայրենի լեզվով կամ այն լեզվով, որին տիրապետում են, հանդես գալու իրավունքի խախտումներ Հայաստանի Հանրապետության ոստիկանության ստորաբաժանումների կողմից թույլ չեն տրվել, այդ հիմքով դատարաններից կամ դատախազությունից քրեական գործերը լրացուցիչ նախաքննության չեն վերադարձվել:

## **Հոդված 12 և 14**

### *Հոդված 12*

*1. Կողմերը անհրաժեշտության դեպքում կրթության և գիտական ուսումնասիրությունների բնագավառում պետք է միջոցներ ձեռնարկեն իրենց ազգային փոքրամասնությունների և բնակչության մեծամասնության մշակույթի, պատմության, լեզվի և կրոնի վերաբերյալ գիտելիքներն ամրապնդելու համար:*

*2. Այս ենթատեքստում Կողմերը, մասնավորապես, պետք է համարժեք հնարավորություններ տրամադրեն ուսուցիչների պատրաստման, դպրոցական դասագրքերով ապահովման համար և դյուրացնեն շփումները տարբեր համայնքների ուսանողների և ուսուցիչների միջև:*

*3. Կողմերը պարտավորվում են ազգային փոքրամասնությունների պատկանող անձանց համար բոլոր մակարդակներով ապահովել կրթության մատչելիության հավասար հնարավորություններ:*

## Հոդված 14

1. Կողմերը պարտավորվում են ճանաչել ազգային փոքրամասնությանը պատկանող յուրաքանչյուր անձի իրավունքը՝ սովորել իր փոքրամասնության լեզուն:
2. Ավանդաբար կամ զգալի քանակությամբ ազգային փոքրամասնությունների պատկանող անձանցով բնակեցված տարածքներում բավարար կարիքի դեպքում Կողմերը հնարավորությունների սահմաններում և իրենց կրթական համակարգերի շրջանակներում պետք է ազգային փոքրամասնությունների պատկանող անձանց համար երաշխավորեն իրենց լեզուն ուսումնասիրելու կամ այդ լեզվով կրթություն ստանալու համարժեք հնարավորություններ:
3. Սույն հոդվածի 2-րդ պարբերության դրույթները չպետք է իրագործվեն ի վնաս պաշտոնական լեզվի ուսուցման և դասավանդման:

158. Հայաստանի Հանրապետության Սահմանադրության 35-րդ հոդվածն ամրագրում է յուրաքանչյուր քաղաքացու կրթության իրավունքը, միջնակարգ կրթությունը պետական ուսումնական հաստատություններում անվճար է: Յուրաքանչյուր քաղաքացի ունի պետական ուսումնական հաստատություններում մրցութային հիմունքներով անվճար բարձրագույն և այլ մասնագիտական կրթություն ստանալու իրավունք:

159. 2009թ. հուլիսի 10-ին ընդունվել է «Հանրակրթության մասին» Հայաստանի Հանրապետության օրենքը, որի 4-րդ հոդվածը սահմանում է, որ Հայաստանի Հանրապետության ազգային փոքրամասնությունների հանրակրթությունը կարող է կազմակերպել իրենց մայրենի կամ ազգային լեզվով՝ հայերենի պարտադիր ուսուցմամբ:

160. 2007թ. դեկտեմբերի 21-ին Հայաստանի Հանրապետության կրթության և գիտության նախարարի կողմից ընդունվել է հրաման, որով փոփոխություններ են կատարվել **Հայաստանի Հանրապետության կրթության և գիտության նախարարի 2003թ. օգոստոսի 25-ի «Հայաստանի Հանրապետության պետական հանրակրթական և հատուկ հանրակրթական ուսումնական հաստատությունների սովորողների ընդունելության կարգը հաստատելու մասին» հրամանում** և սահմանվել է, որ ազգային փոքրամասնությանը պատկանող քաղաքացու երեխաների ընդունելությունը հանրակրթական դպրոց կատարվում է երեխայի ազգային (մայրենի) լեզվով ուսուցմամբ կամ այդ լեզվի դասընթաց ունեցող դպրոցում (դասարանում), իսկ դրա բացակայության դեպքում՝ ուսուցման լեզվի ընտրությունը կատարում են երեխաների ծնողները (նրանց օրինական ներկայացուցիչները):

161. Հայաստանի Հանրապետության կրթության և գիտության նախարարության կողմից յուրաքանչյուր տարի հաստատվում է ազգային փոքրամասնությունների հանրակրթական դպրոցի ուսումնական պլան, որտեղ ժամաքանակներ են հատկացվում ազգային փոքրամասնությունների մայրենի լեզվի, գրականության, մշակույթի և պատմության ուսումնասիրման համար: Հայաստանի Հանրապետության կրթության և գիտության նախարարությունը մշակել է ազգային փոքրամասնությունների կրթության զարգացմանն ուղղված ծրագիր և

Ժամանակացույց, համաձայն որի, յուրաքանչյուր տարի դասագրքեր են տպագրվում Հայաստանի Հանրապետության ազգային փոքրամասնությունների լեզուն, գրականությունը և մշակույթը ուսումնասիրելու համար:

162. Հայաստանի հանրապետությունում եզդիերենի դասավանդմամբ հանրակրթական դպրոցները՝ ըստ մարզերի հետևյալն են.

Վայր	Դպրոց	
Արագածոտն	Սադունց	
	Շենկանի	
	Կանիաշիր	
	Միրաք	
	Թըլըկ	
	Դոմասար	
	Սորիկ	
	Հակո	
	Կանչ	
	Արևուտ	
	Սիչանլու	
	Օթևան	
	Շամիրամ	
	Հացաշեն	
	Արմավիր	Տանձուտ
		Արգավանդ
		Շենիկ
Նալբանդյան		
Քարակերտ		
Արտենի		
Դալարիկ		
Արդաշար		
Եղեգնուտ		
Երասխահուն		
Արշալույս		
Զվարթնոց		
Խանջյան		
Թիվ 10		
Լուկաշին		
Ֆերիկ		
Լեռնամերձ		
Արարատ	Մրգաստան	
	Քաղցրաշեն	
	Նորամարգ	
	Ռանչպար	
	Սարվանլար /Միս/	

	Այգեզարդ
	Այգեպատ
Կոտայք	Նոր-Գեղի
	Զովունի
	Քանաքեռավան
Շիրակ	Ազատան
Երևան	Թիվ 101
	Թիվ 107
	Թիվ 95
	Թիվ 108

Եզդի երեխաները սովորում են հայերենով ուսուցմամբ դասարաններում և ուսումնասիրում են եզդիերեն՝ դպրոցական բաղադրիչի հաշվին:

163. Հայաստանի հանրապետությունում քրդերենի դասավանդմամբ հանրակրթական դպրոցները՝ ըստ մարզերի հետևյալն են.

Վայր	Դպրոց
Արագածոտնի մարզ	Ալազյազ
	Ավշեն
	Ճարճակիզ
	Միրաք
	Շենկանի
	Զամուշլու
	Ռիա-Թազա
	Կանիաշիր
	Միփան
	Միջնատուն

Քուրդ երեխաները սովորում են հայերենով ուսուցմամբ դասարաններում և ուսումնասիրում են քրդերեն՝ դպրոցական բաղադրիչի հաշվին:

164. Հայաստանի Հանրապետությունում հունարենի դասավանդմամբ հանրակրթական դպրոցները՝ ըստ մարզերի հետևյալն են.

Վայր	Դպրոց
Երևան	թիվ 74
Երևան	թիվ 12
Երևան	թիվ 132

1996թ.-ից Երևանի թիվ 12 միջնակարգ դպրոցում, Հայաստանում Հունաստանի դեսպանատան աջակցությամբ և ֆինանսավորմամբ, ուսուցանվում է հունարեն 2-9-րդ դասարաններում՝ կամավորության սկզբունքով: 1997թ.-ից Երևանի թիվ 74 միջնակարգ դպրոցում, Հայաստանի Հանրապետության Կրթության և գիտության նախարարի

հրամանով Հայաստանում Հունաստանի դեսպանատան աջակցությամբ, 2-8-րդ դասարանցիների համար ուսումնասիրվում է հունարեն՝ դպրոցական պարտադիր դասաժամերի հաշվին: 2007թ.-ից Երևանի թիվ 132 միջնակարգ դպրոցում, Հայաստանում Հունաստանի դեսպանատան աջակցությամբ, ուսումնասիրվում է հունարեն՝ խմբակի դասաժամերի հաշվին:

165. Հայաստանի Հանրապետությունում ասորերենի դասավանդման հանրակրթական դպրոցները՝ ըստ մարզերի հետևյալն են.

Վայր	Դպրոց
Երևան	թիվ 8
Արարատի մարզ	Վերին Դվին
	Դեմիտրով
Կոտայքի մարզ	Արզնի

Ասորի երեխաները սովորում են հիմնականում ռուսերենով ուսուցմամբ դասարաններում՝ առաջնորդվելով հատուկ ուսումնական պլանով: Արարատի մարզի Վերին Դվին գյուղի և Կոտայքի մարզի Արզնիի դպրոցների տնօրենները ազգությամբ ասորի են:

166. Ռուսաց լեզվով կրթություն ստանալու մասին տե՛ս զեկույցի 47-60 կետերը:

167. Հայաստանի Հանրապետությունում ազգային փոքրամասնություններին պատկանող դիմորդներն բարձրագույն ուսումնական հաստատություններ ընդունվում են ինչպես ընդհանուր հիմունքներով, այնպես էլ ազգային փոքրամասնությունների ղեկավարների կողմից ներկայացված հայտերի հիման վրա:

168. Ազգային փոքրամասնությունների ղեկավարների գրությամբ ներկայացված դիմորդների ընդունելության հարցը քննարկվում է Հայաստանի Հանրապետության կրթության և գիտության նախարարի հրամանով ստեղծված Հանրապետական ընդունող հանձնաժողովի նիստում: Հաշվետու ժամանակահատված Հանրապետական ընդունող հանձնաժողովը ընդունել է որոշումներ, որոնցով քննությունները դրական միավորներով հանձնած ազգային փոքրամասնությունների դիմորդներն ընդունվել են համապատասխան բարձրագույն ուսումնական հաստատություններ՝ ըստ հայտագրած մասնագիտության:

169. Ազգային փոքրամասնություններին պատկանող այն դիմորդներն, որոնք ընդունվում են պետական բարձրագույն ուսումնական հաստատություններ ընդհանուր հիմունքներով, օգտվում են «Կրթության մասին» Հայաստանի Հանրապետության օրենքով սահմանված բոլոր արտոնություններից, այդ թվում՝ մասնակցում են բուհում կազմակերպվող փոխատեղման գործընթացին (ռոտացիա), սահմանված կարգով օգտվում են ուսման վարձի զեղչման իրավունքից, տրամադրվում են պետական կրթաթոշակներ, ըստ իրենց նախասիրությունների, սահմանված կարգով, մասնակցում են բուհից-բուհ և

ներբուհական փոխադրման գործընթացին, մասնակցում մագիստրատուրայի ընդունելությանը և այլն:

170. 2004-2009թթ. բուհական ուսուցման մեջ ներառված ազգային փոքրամասնություններին պատկանող անձանց թիվը 74 է, այդ թվում.
- Հայաստանի պետական ագրարային համալսարան - 3 ուսանող, որոնք ազգությամբ եզդի են,
  - Երևանի պետական համալսարանում - 23 ուսանող, ազգությամբ եզդի, ասորի, ռուս և հույն,
  - Երևանի Վ. Բրյուսովի անվան պետական լեզվաբանական համալսարան - 2 ասորի ուսանող,
  - Երևանի պետական բժշկական համալսարան - 8 ուսանող, ազգությամբ՝ ասորի, հույն, եզդի, քուրդ և ռուս,
  - Խ. Աբովյանի անվան հայկական պետական մանկավարժական համալսարան - 12 ուսանող, որից 2 ռուս, 6 ասորի, 2 հույն, 1 եզդի, 1 լեհ:
171. Հայաստանի Հանրապետության ազգային փոքրամասնությունների կրթության ոլորտում կատարվել են հետևյալ աշխատանքները, մասնավորապես.
- կազմվել և ներդրվել է 2009թ. «Ազգային փոքրամասնությունների հանրակրթական դպրոցի (դասարանի) օրինակելի ուսումնական պլանը», ըստ որի ազգային փոքրամասնությունների մայրենի լեզվի և գրականության ուսուցման համար 1-11-րդ դասարաններում հատկացված է շաբաթական 39 դասաժամ,
  - լրամշակվել և հաստատվել է եզդիերեն լեզվի և գրականության 1-11-րդ դասարանների հայեցակարգը և ծրագիրը, որը ներառում է նաև եզդի ժողովրդի պատմության և մշակույթի վերաբերյալ նյութեր,
  - ծրագրի հիման վրա 2008թ. ստեղծվել են եզդիերեն լեզվի և գրականության 4-5 – րդ դասարանների դասագրքերը, որոնք հրատարակվել և անվճար բաշխվել են եզդի համայնքի սովորողներին, 2009թ. հրատարակվել է 6-րդ, 7-րդ դասարանների դասագրքերը, իսկ 8-րդ և 9-րդ դասարանների դասագրքերը նախատեսվում է հրատարակել հաջորդ տարիներին:
  - փորձաքննության ընթացքում է «1-10 դասարանների քրդերենի և քրդական գրականության դասավանդման հայեցակարգը և ծրագիրը». Հայաստանի քրդական ազգային խորհրդին առաջարկվել է հայեցակարգը համապատասխանեցնել 12-ամյա ուսուցման ծրագրային պահանջներին,
  - կազմվել և ներդրվել է 2009թ. Երևան քաղաքի Պուշկինի անվան, Կոտայքի մարզի Արզնի, Արարատի մարզի Դիմիտրով և Վերին Դվին գյուղերի դպրոցների ռուսերենով ուսուցմամբ և ասորերենի դասավանդմամբ դասարանների 2009-2010թթ. ուսումնական տարվա օրինակելի ուսումնական պլանը 1-12-րդ դասարանների համար,
  - 2009թ. մշակվել և հաստատվել է «Ասորերեն լեզվի և գրականության» 1-12-րդ դասարանների չափորոշիչը և ծրագիրը, որը ներառում է նաև ասորի ժողովրդի պատմության և մշակույթի վերաբերյալ նյութեր,
  - 2007թ. մշակվել է ասորերենի այբբենարան, որը հրատարակվել և անվճար բաշխվել է համապատասխան դպրոցներին, նախատեսված է 2009թ. պետբյուջեի

շրջանակներում վերահրատարակել «Գրի՛ր և կարդա ասորերեն» գիրք-տետրը և հրատարակել առաջին դասարանի համար «Խոսի՛ր ասորերեն» դասագիրքը:

- հանրակրթական դպրոցի «Հասարակագիտություն» առարկայի չափորոշիչում և ծրագրում ընդգրվել են «Ազգային փոքրամասնությունների իրավունքները» և «Հանդուրժողականություն» թեմատիկ միավորները,
- եզդիների և ասորիների կրթական կարիքներին օժանդակելու, համապատասխան լեզուներով ուսումնական ծրագրերի, դասագրքերի, ձեռնարկների փորձաքննություն իրականացնելու նպատակով գործում են Հայաստանի Հանրապետության Կրթության և գիտության նախարարության «Իրանագիտություն» և «Մեմագիտություն» առարկայական հանձնաժողովները,
- ազգային փոքրամասնությունների կրթական խնդիրներն ուսումնասիրելու և սպասարկելու նպատակով Հայաստանի Հանրապետության ԿԳՆ Կրթության ազգային ինստիտուտում աշխատանքի է ընդունվել ազգությամբ եզդի մասնագետ,
- պարբերաբար անցկացվել են ազգությամբ եզդի ուսուցիչների (շուրջ 56 ուսուցիչ) 30-ժամյա վերապատրաստումներ,

172. Չնայած պետության կողմից ձեռնարկվող քայլերին, որոնք ուղղված են Հայաստանի Հանրապետության ազգային փոքրամասնություններին սեփական մանկավարժներով ապահովելուն, ռուսական՝ մոլդկանական, եզդիական և քրդական համայնքներում այս խնդիրը լիովին լուծել դեռ չի հաջողվել:

173. Այս ժողովուրդների մշակութային ավանդապահությունը նպաստում է երեխաների թերի կրթությանը: Ռուսական՝ մոլդկանական, եզդիական և քրդական համայնքներում աշխատանքը գերադասվում է կրթությանը: Երեխաները փոքր հասակից ներգրավվում են գյուղատնտեսական աշխատանքներում, շատ են բացակայում (հիմնականում սեպտեմբեր և մայիս ամիսներին. եզդի երեխաները ծնողների հետ սարում անասնապահությամբ են զբաղված, մոլդկաններն օգնում են ծնողներին երկրագործական աշխատանքներում. բերքահավաք, գարնանացան և այլն) կամ ընդհանրապես կրթությունը չեն համարում անհրաժեշտություն կյանքում կայանալու համար:

174. Եզդիական և քրդական համայնքներում խնդիրն էլ ավելի է բարդանում պայմանավորված աղջիկների հանդեպ համայնքի կողմից դրսևորվող խտրական վերաբերմունքով: Աղջիկների մեծ մասը վաղ հասակում թողնում են կրթությունը:

175. Մոլդկանական գյուղերի դպրոցներում մանկավարժների խնդիր որպես այդպիսին չկա: Այնտեղ հիմնականում դասավանդում են ազգությամբ հայ ռուսերենի իմացությամբ որակավորված մանկավարժներ: Եզդիական և քրդական գյուղերում եզդիերեն, քրդերեն դասավանդող կադրերի լուրջ խնդիր կա: Գործնականում դպրոցներում եզդիերեն են դասավանդում միջնակարգ, երբեմն՝ ութամյա կրթությամբ մարդիկ, ովքեր ժամանակ առ ժամանակ վերապատրաստվում են Հայաստանի Հանրապետության կրթության և գիտության նախարարության ազգային ինստիտուտում:

176. Ուսման հանդեպ այսպիսի մոտեցման հաղթահարման խնդիրը գտնվում է Հայաստանի Հանրապետության համապատասխան պետական մարմինների՝ Հայաստանի Հանրապետության կրթության և գիտության նախարարության, Հայաստանի Հանրապետության կառավարության ազգային փոքրամասնությունների և կրոնի հարցերի վարչության և մարզպետարանների կրթության բաժինների ուշադրության կենտրոնում: Վերջիններս պարբերաբար հանդիպումներ են ունենում համայնքների ներկայացուցիչների հետ՝ խնդրի քննարկման նպատակով: Դպրոցի տնօրենները պնդում են, որ բազմիցս տեղեկացրել են աշակերտներին և նրանց ծնողներին Հայաստանի Հանրապետության համապատասխան ԲՈՒՀ-երում և Ա. Բակունցի անվան մանկավարժական ուսումնարանում նպատակային տեղերի մասին, որտեղ ազգային փոքրամասնության ներկայացուցիչները կարող են բարձրագույն կրթություն ստանալ և հետագայում աշխատել հարազատ համայնքում, սակայն առայժմ ոչ մի արձագանք չի եղել:

177. Հայաստանի Հանրապետությունում առկա խնդիրը՝ կապված եզդիական և քրդական էթնիկ ինքնագիտակցության հետ բավական խնդիրներ էր առաջացրել դպրոցական դասարանների տպագրման համար: Որոշվել է բավարարել երկու ժողովուրդների պահանջները, եզդիների համար տպագրել եզդիերենի դասագրքեր՝ կիրլիլիցայով, քրդերի համար քրդերեն դասագրքեր՝ լատինատառ, հաշվի առնելով նաև այն հանգամանքը, որ քրդական համայնքը գտնում է, որ լատինական տառատեսակն իրենց կօգնի շփվել քրդական միջազգային կազմակերպությունների հետ և օգտվել արտերկրի քրդական գրականությունից:

178. Ի դեպ կրթության ցածր մակարդակը եզդիական և քրդական համայնքներում պայմանավորված է նաև այն հանգամանքով, որ երեխաներն առաջին դասարան են գալիս հայերենին՝ կրթության լեզվին չտիրապետելով: Այս համայնքներում, ինչպես նաև հայաբնակ շատ համայնքներում, չկան մանկապարտեզներ: Գյուղերի բյուջեն թույլ չի տալիս ֆինանսավորել մանկապարտեզները: Այդ նպատակով Հայաստանի Հանրապետության կրթության և գիտության նախարարությունում քննարկվում են եզդիական և քրդական գյուղերում նախակրթարաններ բացելու հնարավոր տարբերակները:

179. Իրականացվում են նաև աշակերտների սոցիալական պաշտպանվածությանն ուղղված աշխատանքներ: Դրանք իրականացվում են նաև որոշ միջազգային կազմակերպությունների կողմից (World Vision, ՄԱԿ-ի պարենի համաշխարհային ծրագիր (UNWFP) և այլն): Այս ծրագրերը ներառում են սննդի, հագուստի և դպրոցական պիտույքների տրամադրում: Հանրակրթական միջնակարգ դպրոցների տարրական դասարանների աշակերտներին պետությունն ապահովում է անվճար դպրոցական դասագրքերով (երեք տարի): Ազգային փոքրամասնությունների դպրոցների երեխաները նույնպես ապահովվում են դասագրքերով:

### Հոդված 13

1. *Իրենց կրթական համակարգերի շրջանակներում Կողմերը պետք է ճանաչեն, որ ազգային փոքրամասնության պատկանող անձինք*

*իրավունք ունեն ստեղծելու և ղեկավարելու իրենց սեփական մասնավոր կրթական և վերապատրաստման հաստատությունները:*  
2. Այս իրավունքի իրագործումը Կողմերի վրա ոչ մի ֆինանսական պարտավորություն չի դնում:

180. Հայաստանի Հանրապետությունում ազգային փոքրամասնությունների հասարակական կազմակերպությունների կողմից ստեղծվել և գործում են իրենց լեզուներով կիրակնօրյա դպրոցներ: 2009թ. դրությամբ գործում են լեհական, հունական, վրացական, հրեական, բելառուսական և ուկրաինական կիրակնօրյա դպրոցները:

### **Հոդված 15**

*Կողմերը պետք է անհրաժեշտ պայմաններ ստեղծեն ազգային փոքրամասնությունների պատկանող անձանց արդյունավետ մասնակցությունը մշակութային, հասարակական և տնտեսական կյանքում, ինչպես նաև պետական գործունեության մեջ, մասնավորապես, իրենց առնչվող հարցերում ապահովելու համար:*

181. Հայաստանի Հանրապետության Սահմանադրության 30-րդ հոդվածը սահմանում է, որ Հայաստանի Հանրապետության տասնութ տարին լրացած քաղաքացիներն ունեն ընտրելու և հանրաքվեներին մասնակցելու, ինչպես նաև անմիջականորեն և կամքի ազատ արտահայտությամբ ընտրված իրենց ներկայացուցիչների միջոցով պետական կառավարմանը և տեղական ինքնակառավարմանը մասնակցելու իրավունք: Հայաստանի Հանրապետության Սահմանադրության 64-րդ հոդվածի համաձայն, պատգամավոր կարող է ընտրվել քսանհինգ տարին լրացած, վերջին հինգ տարում Հայաստանի Հանրապետության քաղաքացի հանդիսացող, վերջին հինգ տարում Հանրապետությունում մշտապես բնակվող և ընտրական իրավունք ունեցող յուրաքանչյուր ոք:

182. Հայաստանի Հանրապետության ընտրական օրենսգրքի 3-րդ հոդվածն իր հերթին սահմանում է. «Ընտրական իրավունք ունեցող քաղաքացիները՝ անկախ ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից, գույքային կամ այլ դրությունից, ընտրելու և ընտրվելու իրավունք ունեն: Այդ հիմքերով ընտրական իրավունքի ցանկացած սահմանափակում հետապնդվում է օրենքով»: 4-րդ հոդվածով ապահովվում է քաղաքացիների՝ ընտրություններին մասնակցելու հավասար հիմունքներ և հավասար պայմաններ իրենց ընտրական իրավունքի իրականացման համար:

183. Իր հերթին Հայաստանի Հանրապետության քրեական օրենսգիրքը սահմանում է, որ մարդու և քաղաքացու իրավունքներն ու ազատություններն ուղղակի կամ անուղղակի խախտելը՝ կախված անձի ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից,

գույքային կամ այլ դրույթունից, որը վնաս է պատճառել անձի օրինական շահերին, պատժվում է տուգանքով կամ ազատազրկմամբ:

184. Հայաստանի Հանրապետությունը 1993թ. դեկտեմբերի 21-ին վավերացրել է «Աշխատանքի և զբաղմունքների բնագավառում խտրականության մասին» Աշխատանքի միջազգային կազմակերպության 111 կոնվենցիան, որն ուժի մեջ է մտել 1995թ. հուլիսի 29-ին և որի դրույթները իրենց արտացոլումն են գտել Հայաստանի Հանրապետության համապատասխան ներպետական իրավական ակտերում:

### **Հոդված 16**

*Կողմերը պետք է ձեռնպահ մնան այնպիսի միջոցներից, որոնք փոխում են բնակչության կառուցվածքային կազմը այն տարածքներում, որոնք բնակեցված են ազգային փոքրամասնություններին պատկանող անձանցով, և նպատակ ունեն սահմանափակելու սույն Շրջանակային կոնվենցիայի սկզբունքներից բխող իրավունքները և ազատությունները:*

185. Հայաստանի Հանրապետության կառավարությունը բնակչության կառուցվածքային կազմը փոխելուն միտված քաղաքականություն և միջոցառումներ չի իրականացում: 2008թ. Արագածոտնի մարզի Սորիկ գյուղի բնակչության խնդրանքով՝ «Եզդիական ազգային միություն» հասարակական կազմակերպությունը դիմել էր Հայաստանի Հանրապետության կառավարությանը՝ խնդրանքով, որ համայնքների խոշորացման ծրագրի շրջանակներում Սորիկ, Կանչ և Հակո եզդիական բնակչություն ունեցող գյուղերը համարվեն մեկ համայնք: Համայնքների խոշորացման ծրագիրը ընթացքի մեջ է, և նախատեսվում է ծրագրի շրջանակներում բոլոր եզդիական գյուղերը միավորել նույն համայնքների մեջ:

### **Հոդված 17**

*1. Կողմերը պարտավորվում են չխոչընդոտել ազգային փոքրամասնություններին պատկանող անձանց իրավունքը՝ հաստատել և պահպանել ազատ և խաղաղ միջսահմանային շփումներ այլ պետություններում օրինական կերպով գտնվող անձանց հետ, մասնավորապես, նրանց հետ, ովքեր ունեն ընդհանուր էթնիկական ինքնություն, լեզվական, կրոնական կամ մշակութային ընդհանուր ժառանգություն:*

*2. Կողմերը պարտավորվում են չխոչընդոտել ազգային փոքրամասնություններին պատկանող անձանց՝ ոչ կառավարական կազմակերպությունների գործունեությանը ազգային և միջազգային մակարդակներով մասնակցելու իրավունքը:*

186. 2009թ. ապրիլի 27-ին Մետրոպոլ հյուրանոցում տեղի ունեցավ Հարավային Գովկասի երկրների ռուս հայրենակիցների կազմակերպությունների երրորդ տարածքային խորհրդաժողովը: Այն նվիրված էր ռուսական ինքնության, լեզվի և մշակույթի պահպանման խնդիրներին: Հրավիրված էին Ռուսաստանի Դաշնության

դաշնային խորհրդի պատգամավորներ, Ռուսաստանի Դաշնության արտաքին գործարի նախարարության ներկայացուցիչներ, «Ռուս հայրենակիցների» կազմակերպության անդամներ Վրաստանից, Օսիայից և Աբխազիայից, Հայաստանի Հանրապետությունում Ռուսաստանի Դաշնության դեսպանատան աշխատակիցները, ԵԱՀԿ երևանյան գրասենյակի ղեկավարը, Հայաստանի Հանրապետության Ազգային ժողովի պատգամավորներ և այլ պաշտոնատար անձինք: Հարկ է նշել, որ նախորդ երկու խորհրդաժողովները տեղի էին ունեցել Բաքու և Թբիլիսի քաղաքներում: Հայաստանի Հանրապետության ռուսական համայնքի ներկայացուցիչները մասնակցել են նախորդ հավաքներին: Այս տարի ռուսական համայնքի ադրբեջանցի գործընկերները չէին մասնակցում խորհրդաժողովին, որովհետև այն Հայաստանում էր անցկացվում:

187. Հայաստանի Հանրապետության ազգային փոքրամասնությունների ներկայացուցիչները յուրաքանչյուր տարի մասնակցում են միջազգային համագումարներին և խորհրդաժողովներին:

### **Հոդված 18**

- 1. Համապատասխան ազգային փոքրամասնություններին պատկանող անձանց պաշտպանությունն ապահովելու համար Կողմերը անհրաժեշտության դեպքում պետք է ջանք գործադրեն այլ պետությունների, մասնավորապես, հարևան երկրների հետ երկկողմ և բազմակողմ համաձայնագրեր կնքելու համար:*
- 2. Կողմերը անհրաժեշտության դեպքում պետք է միջոցներ ձեռնարկեն միջսահմանային համագործակցությունը խրախուսելու համար:*

Տե՛ս նախորդ գեյույցը:

### **Հոդված 19**

*Կողմերը պարտավորվում են հարգել և կիրառել սույն Շրջանակային կոնվենցիայի սկզբունքները՝ անհրաժեշտության դեպքում կատարելով միայն այնպիսի սահմանափակումներ և բացառություններ, որոնք նախատեսված են միջազգային իրավական փաստաթղթերում, մասնավորապես, «Մարդու իրավունքների և հիմնարար ազատությունների պաշտպանության մասին» Կոնվենցիայում, այնքանով, որքանով դրանք վերաբերում են նշված սկզբունքներից բխող իրավունքներին և ազատություններին:*

188. Հայաստանի Հանրապետության Ազգային ժողովի կողմից 2008թ. նոյեմբերի 27-ին ընդունված նոր օրենքը «Փախստականների և ապաստանի մասին» մշակվել է Հայաստանի Հանրապետության կառավարության և ՄԱԿ-ի Փախստականների հարցերով գերագույն հանձնակատարի հայաստանյան գրասենյակի համագործակցությամբ: Նոր օրենքն ընդունվել է «Փախստականների կարգավիճակի վերաբերյալ» 1951թ. Ժնևի կոնվենցիայի և արձանագրության,

միջազգային այլ փաստաթղթերի պահանջներին առավելագույնս համապատասխանեցնելու նպատակադրությամբ:

189. Օրենքով սահմանված է «փախստական» հասկացությունը, այն է՝
- «ա) այն օտարերկրյա քաղաքացին, որը ռասայական, կրոնական, ազգային, սոցիալական որոշակի խմբի պատկանելության կամ քաղաքական հայացքների համար հետապնդման ենթարկվելու հիմնավոր երկյուղի հետևանքով գտնվում է իր քաղաքացիության երկրից դուրս և չի կարող կամ նույն երկյուղի պատճառով չի ցանկանում օգտվել իր քաղաքացիության երկրի պաշտպանությունից, կամ նա, ով, չունենալով քաղաքացիություն և գտնվելով իր նախկին մշտական բնակության երկրից դուրս, չի կարող կամ այդ նույն երկյուղի պատճառով չի ցանկանում վերադառնալ այնտեղ,
  - բ) այն օտարերկրյա քաղաքացին, որը ստիպված է լքել իր քաղաքացիության երկիրը, իսկ քաղաքացիություն չունեցող անձը՝ իր նախկին մշտական բնակության երկիրը՝ համատարած բռնության, արտաքին հարձակման, ներքին հակամարտությունների, մարդու իրավունքների զանգվածային խախտումների կամ հասարակական կարգը խախտող այլ լուրջ իրադարձությունների պատճառով»:
190. Նույն օրենքի 27-րդ հոդվածն ամրագրում է, որ Հայաստանի Հանրապետությունում ապաստան ստացած փախստականները, ապաստան հայցողները և նրանց ընտանիքի անդամները՝ իրենց բնակության վայրի ընտրության և պետության տարածքում ազատորեն տեղաշարժվելու իրավունքի առումով օգտվում են Հայաստանի Հանրապետության քաղաքացիների համար սահմանված նույն իրավունքներից: